

**Maki Nasumo Naña Pol Siri  
Pa Pan Li Nalelagaena Wa Lala  
Nae Garu  
KOREN  
Visayuena Na Tusi Nene**

*Komþasnen suniena plas na tusi nini*

Maki nini pe mñaki naña Pol siri þesa pa le Koren lala naña amlelaga e Yesu. Naga siria komin suri viowa la suñalu e maliena kiena li nalelagaena lala nae yo nene, a naga mligan mñaki nene pano vena iila la. Sumñare nae Koren, Pol ke narui naga siaria.

Koren naga pupia pulkumali kiena le Kris lala, a naga pe pulkumali keviu na lepas naña Akaea, naña meke vatanon þarin suþe nae pulkumali naña Rom. Yaru nae purvanua taþena la moki asike e nene, a naga pe yo tai naña yaru la akila ruruia e lepas na kilaen yumñaena na tauluen kilavaru, a e lepas na kiela þelaga marua. A la nae yo nene, kiela kia keviu e yomarava komin kiela þelaga viowa lala, a naña amlotun ke ntewa taþena la moki.

Suri kerkeviu la naña Pol pisayu e kiena mñaki nene sanini:

pisayu napiowaena naña yaru na sumñare la  
asumña amliþere la,

pisayu napiowaena naña la asumña akila ke  
piowa pa sira lala,

pisayu mrapa mesmesu na kilaen talovaena,

pisayu sanape e kinanena lala naña akila kuþaþaena e la van nono lala.

Pol pisatañe kiela naviuniena laþasa, ana pian la e mrapa mesmesu na tavevena vena alotu e suñare, amio ñareraena la naña Ninuna Wa suña kian ke pa suñare, a nalelagaena naña yaru kilia mali sina. Pol kila meraravan naña kilia ruru napiowaena a navisatañeena la nene, a pisa meraravan naña lologena wo kiena Yesu ga kilia la navisatañeena van la.

E marana na keviu 13 pisayu þelaga na sinesien Ntewa amio yaru lala naña pe þelaga keviu tai naña yeririna kiena Ntewa la monar atavevea. Marana na keviu nene pe komþasnen visena kiena ne Ntewa naña yaru la akilia ruruia, taulu komþas taþena la na tusi nene.

*Komþasnen tusi laþas nene*

Visena þesa 1:1-9

Yaru na suñare la amliþere la 1:10—4:21

Mlamulena viowa amio sira, a malena na mratava 5:1—7:14

Li nalelagaena lala a yaru la naña amninue Ntewa 8:1—11:1

Mrapa kiena li nalelagaena lala na kilaena lotena 11:2—14:40

Yesu mali sina, a yaru la naña alelaga ea akilia amali 15:1-58

Nalaena naña aligan va van li nalelagaena lala nae Yutea 16:1-4

Visena maro 16:5-24

*Pol sike gar Episas, pisa pokolulagi pona pokolemalo pan le Koren lala*

<sup>1</sup> Erau nae Koren lala, inu naþa nesiri m̃aki nini piñasu pan amiu, inu Pol, naþa Ntewa sinenan sape neimi neve nalologena tai kiena narina Yesu Kristo, ana pio inu, pisirlua inu vena nouarar yum̃aena na sanini.

Nesike e yo nini nemio kieta erau Sostinis, ana imimi lua mepisa pokolulagi pona pokolemalo pan amiu punu ga, <sup>2</sup> nae sum̃are kiena ne Ntewa e pupia pulkumali nene Koren. Kam ke narui naþa Ntewa pio amiu aimi vena asikol amiu amio kiena li nalelagaena taþena lala, naþa asutetae asike e yo punu ga naþa asum̃a amlotun naga naþa kila ita tepe wa ruru rui, nane Yesu Kristo naþa naga pe kieta Suþe ita punu ga.

<sup>3</sup> Memlen mesape lemamiena kiena ne Yesu Kristo a sum̃are kiena ne Ntewa arimata sike amio amiu.

*Pol pisa potena pa Ntewa komin naviawaena kiena le Koren lala*

<sup>4</sup> Nepisu sane pogos naþa apim ape yeririna kiena Kristo Yesu, lemamiena kiena ne Ntewa sum̃a miyum̃ae keviu e kiamiu malena lala, ana silaga nesum̃a nepisa potena keviu vanonia.

<sup>5</sup> Asum̃a apim apo manene laa e lepas na visawalen Lologena Wo, a asum̃a apa ke metava e lepas na kiamiu nakiliaena, e m̃ena ga e lepas na þelaga wo taþena make ga lala. <sup>6</sup> Pogos naþa nepisu nene, nepisu sa ga kiau yum̃aena la nanua ne, naþa nepian amiu e Kristo, nagane sum̃a þar ke pupia mrasa.

<sup>7</sup> Nalaena lala pona nam̄areraena lala nāpa Ninuna Wa sum̄a kian pan amiu, pe tai re nāpa pe atol re poli wa, ana asum̄a amiyum̄ae ke amio la po pāisi, komin akirakiravan ke nāpa kieta Sūpe Yesu Kristo kilia imi m̄alivi si e yomarava nini.

<sup>8</sup> Naga pe pimi m̄alivi re poli wa, ana naga sum̄a miila ita silaga vena tesum̄alu m̄arera tesum̄a ga vano-o tol legiena maro nene, ana pogos nāpa tesum̄alu tese marana ne Ntewa, yoko naga kila nāpa naviowaena tāpatete se ita.

<sup>9</sup> Ntewa pisaar rui vena viewo ita, ana tekilia towasine ruru kiena visena nene, komin naga pio ita, p̄ere ita sikol ita teve erau wo temio narina, Yesu Kristo kieta Sūpe.

### *Sum̄are sum̄a mlilīpere pāisi*

<sup>10</sup> Kiau namratava lala kiena kieta Sūpe Yesu Kristo, nesape neviun manene van amiu e kiena kia, nesape āpionli nāpa aim ave taaga sina. Popon ve alilīpere amiu re, ana amiu, kiamiu sitomena a kiamiu visena monar ve taaga.

<sup>11</sup> Nepisa visena la nene, komin la nāpa puna yaru nene Kloe apim apisawal pan inu asape veveyuena sike likan amiu, olai lala a vineu lala.

<sup>12</sup> Nemloge nāpa amiu peve taaga asum̄a apisasa ke kiamiu p̄egas lala asape “In na yoko netaveve Pol,” pona tāpena sape “O, in na nepe kiena Apolos,” pona tai sina, sape “O, in na nesikol inu e p̄egas kiena Kēpas.” A lāpas sina, apisirilua si kiela narin p̄egas lāpasia, akoven

plan taŕena lala, asape “O, imimi ga mepe yeririna kiena Kristo lelaga.”

<sup>13</sup> Ke, ya ne akila ke sanene? ?Pona popon tetewowa Kristo ve kinakinasa, teliwerwere e kiamiu narin ŕegas la sanene? ?Pona laŕas asape ape kiau Pol, komin naŕa asitom asape in ke narui naŕa netelan inu e laki torovia vena netamalia la? ?Pona laŕasia sinela ŕesan naŕa akeela e kia kiena Yesu, ana asitom asape akeela e kiau kia?

<sup>14-16</sup> Sanene, nepisu pogaga naŕa nanua ne, pe nekee amiu re nena tai poli, Krispas ga lalua Kaias, pona sineu ŕesania, nekee mŕena Steŕanas amio namratava puna, a pe nesitoŕnal re si po laa rui, sane la ga nene, pona laŕas sina? Nepisa sanene komin naŕa visae nekee amiu ve moki, pona asuŕalu avis vilaveena rui, asuŕa avisave “!O, imimi ke narui, naŕa Pol kee imimi e kiena kia!”

<sup>17</sup> Sanene piowa ga, komin Kristo pe mligan inu re nepimin keen yar la poli, ana mligan inu nepimin lologonen kiena Lologena Wo van la. A pogos naŕa nemlologon ke sanene, pe nekila re nemio mŕareraena na manmaruaena na yomarava nini poli, ana nekila amio mŕareraena na laki torovia kiena ne Kristo.

*Kristo kipian manmaruaena a mŕareraena kiena ne Ntewa*

<sup>18</sup> Ana yaru la naŕa asuŕa ataveve ke mrapa na kovioena, amloge visena na laki torovia kiena ne Kristo sane suri tai naŕa pe sur korena ga

pan la, ana ita la naña tetaveve ke mrapa na malena, temloge visena na kiena laki torovia sane m̃areraena kiena ne Ntewa natamalia itaena.

<sup>19</sup> Naga nene sane visena kiena Siriena Wa tai, naña Ntewa pisa sanini, sape  
*“Yoko nowe plan manmaruaena kiena la naña asitom ke asape ape manmarua,  
 yoko nekilawo nakiliaena kiena la naña asitom ke asape akilia suria.”* *Ais 29:14*

<sup>20</sup> Ana visena nene pe lelaga pañisi, komin naña tepisusu yomarava, tekilia teviun tevisa sanini tevisave awa kiena yaru na manmaruaena lala? Awa yaru la naña apisuveve ruru kiliaena la naña sike e tus lala? Awa yaru la naña akilia avisayu ruru sitomena la naña pe tañena pe tañena naña tetelivi ke nagane? Tepisu sane peraga yo, a tepisu sane Ntewa kila manmaruaena lala na yomarava nini apimi sane sur wowe ga tai rui.

<sup>21</sup> Ntewa ga pe manmarua, a e kiena manmaruaena, naga kila sane manmaruaena na yomarava nini tañatete kilia kila yaru kilia naga. Ana naga pisu sane po laa sane vena kila naña kiamimi lologena lala, naña yaru la asitom ke asape pe wowe ga, kilia tamalia yaru naña mlelaga ea.

<sup>22</sup> Le Yu la moki liu naña yepela mavin lelaena, asumã apisavisa ke asape visae mekila kile lala, yoko alelaga ga na wa, a le Krik la moki liu yepela mavin lelagaena, asumã apisa ke asape visae mevis mesmesu nena e kiela nakiliaena marua lala, yoko alelaga ga na wa,

<sup>23</sup> ana pe mekila re sanene pan la poli. Memlologon ga Yesu pan la, mesape naga marewo kiela mlamulena viowa lala e laki torovia, ana visena nene, le Yu lala asape tařatete alelaga ea, a le Krik lala, asape visena na wowe ga nene.

<sup>24</sup> Ana e lepas kiena ne la nařa Ntewa pio la vena ave kiena, sane ita, nařa ita lařas tepe le Yu a ita lařas tepe le Krik, pe sa re nene poli. Ve tesitom re tesape tevisu kile tařena, komin nařa tepisu kilale mřareraena kiena ne Ntewa e yuřaena kiena Kristo rui, a ve tesitom re tevisave tetaveve kiliaena tařena, komin nařa tepisu kilale namanmaruaena kiena ne Ntewa e mrapa kiena Kristo natamalia itaena.

<sup>25</sup> Yaru tařena lala apisu nařa Ntewa tařan Kristo mare e laki torovia, asitom ke asape Ntewa malumu ga, ana peraga. Sur nene kila meraravan kiena mřareraena nařa mřarera laa sane, taulu mřareraena kiena yaru. Apisu sur nene, asitom asape Ntewa pe wowe ga, ana peraga, kipian kiena manmaruaena nařa po manene laa taulu manmaruaena kiena yaru.

<sup>26</sup> Wolai a vineu lala, asitomyuli sane kam na sanapen nařa Ntewa pio amiu ape kiena? Pe ita moki re poli nařa e lepas na visuena na yomarava, ita temanmarua, pona tepe yaru mřarera, pona tepe yaru kerkeviu lala. <sup>27</sup> Yomarava nini sape tepe wowe, ana Ntewa řere ita, ana kome ita suřa kila plan ke manmaruaena na yomarava. Yomarava nini sape ita temalum ga, ana Ntewa řere ita, ana kome ita, suřa kila ke mřareraena na yomarava pito tano. <sup>28</sup> Yomarava

nini pisa ke sape ita yaru korena ga naña tesike tano, ana Ntewa ðere ita, ana kome ita, sumña kila ke pupia sur kerkeviu la pito tano, kila apimi ape suri korena.

<sup>29</sup> Sanini, pe yar re nena tai naña kilia visirlua naga e marana Ntewa, sape naga pe manmarua, pona naga mñarera, pona naga yar tai ne, <sup>30</sup> ana Ntewa ga pe purþes nen kieta malena viu temio Kristo Yesu. Naga ke narui pitetalia Yesu pimi kilologia mrapa pan ita, ana Yesu pul plan ita, kila ita temesmesu e marana, kila ita tepimi tepe kiena yaru wa lala.

<sup>31</sup> Ana komin suri ne nanene, tepisu naña visena kiena ne Tusi Wa tai pe lelaga paþisi, naña pisa sanini, sape

*“Yaru naña sinenan sape warwaria, naga kilia warwarian ga kieta Suþe.”* *Ser 9:24*

## 2

*Pol mlologon lak torovia kiena Yesu e mñareraena kiena Ninuna Wa*

<sup>1</sup> Erau lala, nanua kam na amninue visena kiena ne Ntewa lala, ana nepim nepisawal pan amiu. Ana sa ga naña apisuia, pogos naña nepimin nekila, pe nekila re naña nepilaven visena piayavi lala pona manmaruaena kiena yaru. <sup>2</sup> Nekila kiau sitomena mñarera nesape pogos naña nesike likan amiu, yoko ve nesitoñal re si sur taþena, ana yoko nelologon ga Yesu Kristo, amio kana marena e lak torovia. <sup>3</sup> Nesike nemio amiu, nemloge sane yepeu malumu paþisi, nemarau, sineu kurkur, <sup>4</sup> a kiau visena a kiau



suniena pe pulen re nena manmaruaena pona kiliaena kiena yaru. Ana e pogos nene, amloge naþa kiau visena lala apulen m̄areraena kiena Ninuna Wa, <sup>5</sup> a kila sane kiamiu naviawaena pe suñal re su e visena na manmaruaena kiena yaru poli, ana suñalu su e m̄areraena kiena ne Ntewa.

*Manmaruaena kiena ne Ntewa*

<sup>6</sup> Lelaga naþa kiau visena pe pulen re visena lala na manmaruaena na yomarava nini poli, pona kiliaena kar la naþa yerkaawa na yomarava nini la akekarana poli, ana pogaga, komin yomarava nini amio kiena yerkaawa lala yoko avano amap ga. Ana kam la naþa kiamiu sitomena marua ruruia, apisu kilale naþa kiau visena lala pulen ruru nena manmaruaena kiena ne Ntewa.

<sup>7</sup> Kiena manmaruaena nene, naga þarpolo ruru sike pa rui sumon naþa naga si yomarava nini, ana manmaruaena nene tapolou ruru suñã ga, yar la pe akilia re nena ga, ana nagane narui molue merarava ruru ga pan ita na wa sane pupia visaruruena tai naþa Ntewa mlavia vena kila ruruiaena. <sup>8</sup> A kiena manmaruaena nene m̄alivin ita e mrapa naþa Yesu pimi tamalia ita, ana yerkaawa na yomarava lala pe apisu kilale re sur nene poli, ana atarar Yesu, naþa naga pe pupia Suþe na urarena nae ma e peni, la atelanm̄ar naga metava e laki torovia. <sup>9</sup> Yeririna la pe apisu kilale re sitomena kiena ne Ntewa sanene poli, naga sane Siriena Wa tai, naþa pisa sanini sape

*Sur nowo la naþa kilamarana yaru pe pisuli re poli wa, pona kiligana yaru pe mlogeli re*

*poli wa, pona los nen yaru pe sitomli re poli wa,*

*ana sur ke la nene Ntewa kila ruru suña ga pe kiena ne kiena yaru la naña sinela si naga.*  
*Ais 64:4*

<sup>10</sup> Ana ita, ita na tekilia navisa ruruena la nene, komin Ninuna ne Ntewa naña pisu kilale make suria, a kilia make sitomwanena kiena ne Ntewa, naga kipian itania. <sup>11</sup> Sa ga ita yeririna, naña yar tañena mninue ya naña sike e kieta sitomena, ana ninuta ga kilia ruru po. Ana maran taaga mña sa nene e Ntewa. Pe tekilia re ya naña sike e kiena sitomena poli, ana Ninuna ga kilia mña, ana pisawal pan ita. <sup>12</sup> Pe ninuna na yomerava re ga nini tai poli naña pisawal pan ita, ana Ninuna Wa nene naña molue ma puna Ntewa pitomi, naga ke narui naña kila ita tepisu kilale ruru nalaena wo la naña Ntewa suña kian ke pan ita.

<sup>13</sup> Sanene, popon avisu kilale mña sane ki-amimi visena la naña pimi ke pan amiu, pe amolue re e manmaruaena kiena yar poli, ana Ninuna Ntewa ga suña pian itania. Sanene, mesuña moñar ke visena lelaga lala kiena Ninuna Wa nene, ana memligan sike e amiu naña Ninuna nene sike e kiamiu malena rui. <sup>14</sup> Yar naña Ninuna pe su re e kiena malena poli, naga tañatete visu kilale sur lala na Ninuna, naga sane pe yar tetan ga e la, ana naga tañatete nena tol mñareraena la naña Ninuna kiania. <sup>15</sup> Yaru naña Ninuna sike e naga, yoko naga kilia visu kilale ruru sur make ga, ana yar naña Ninuna pe su re e naga poli, naga tañatete visu kilale ruru ya

naña sike e malena kiena yaru naña Ninuna sike ea. <sup>16</sup> Visena Wa pisa sanini, sape  
*Pe yar re nena tai naña kilia ya naña sike e  
 sitomena kiena ne Ntewa poli,  
 pe yar re nena tai naña kilia vian si sur va Ntewa  
 poli.* *Ais 40:13*

Visena nene pe lelaga pañisi, ana e ita naña Ninuna sike e ita, tetol sitomena kiena Kristo rui.

### 3

*Pe pon re veveyuena su likan nalelagaena la poli*

<sup>1</sup> E pogos naña nesike nemio amiu nanua ne, sineun nesape nevis ruru nemio amiu sa naña kam na ape yeririna naña Ninuna ne Ntewa sike e kiamiu malena rui, ana peraga. Nepisu sane kam na pe atoroki re poli wa, nane kila narui nepis pan amiu sa naña kam na ape yar na yomarava ke ga wa, naña e lepas na kiamiu malena amio Kristo, kam na sa ke sisi tomtom lala wa. <sup>2</sup> Sanene, nepagan amiu e ga e yu, tařatete nela kinanena m̃arera van amiu, komin kam na pe atorokin re poli. Ana pimi tol nagane, nepisu sane kam na pe atoroki re poli wa, <sup>3</sup> komin naña řelaga na yomarava nini mok liu sike likan amiu wa. Pona kam na pe apisu kilale re poli yo, ana pogos naña vielueena amio veveyuena sike e amiu, kana kinasa sane asike e yemalolo na wa, kiamiu řelaga sa ga řelaga kiena yaru. <sup>4</sup> Merarava ruru po pañisi naña amiu na sanene, komin

naŕa asuŕa amliŕere amiu ke sanene. Kam laŕasa asuŕa apisa inu, asape “Aulai, imimi na mekekaran Pol, metaveve naga,” a kam laŕasa asuŕa apisa ke erau nalologena Apolos nene, asape “Ke, imimi na mekekaran Apolos, metaveve naga,” ana sitomena sur la ne sanene, sitomena kien yar ga.

<sup>5</sup> Visae sinemiun avisayu kiamimi kia imimi lua Apolos, popon asitom ruruia avisave imimi lua mepe yar sur na sanape? Imimi lua mepe yar kiena Suŕe ga, vena kilaen yuŕaena naŕa mligan sike e limamimi, vena kila sane akilia alelaga ea. <sup>6</sup> E lepas na yuŕaena nene, in ke narui nemapila kurusia, a Apolos ke narui naga ŕeleule susia, ana Ntewa ga naŕa kila purŕesia kapuru pimi kerkeviu ŕar mrasa. <sup>7</sup> Ana monar tevisu kilale sane yar naŕa mapila kurusa, a naga naŕa ŕeleule susia, lalua pe akila re pupia sur tai poli, ana naga naŕa kila purŕesia pimi keviu ŕar mrasa, naga ke narui kila pupia suria. <sup>8</sup> Ana imimi lua, naŕa tai mapila kurusa, a tai ŕeleule susia, imimi lua memiyuŕae maran taaga ga, a yoko imimi luoka ga mowar kiamimi nalaena torokin kiamimi yuŕaena. <sup>9</sup> Pe sa re naŕa imimi lua, imimi yar tai naga po, a tai piowa ga, ana imimi lua mepe yar na yuŕaevaiena lele taaga kiena ne Ntewa, a amiu na sane porotano naŕa memiyuŕae ea.

Pona kana totou taŕena na visaena, nekilia nevisave kam na sane yuŕa tai naŕa Ntewa suŕa miyuŕaenia. <sup>10</sup> Ntewa mla kiliaena wo

pan inu, ana nemiyum̃ae sane yar tai naþa yepena m̃aen yum̃aena, nemiyum̃aen þeren yum̃a tai naþa m̃arera ruruia sike na. Ana siraunia, pe in re naþa nepisirlua yum̃a metava e þerena nene poli, ana erau taþena nene pimi suñã miila nayum̃aenen yum̃a. A kam ke sina ga laþasa akilia aiila nakilaen yum̃a metava e kana þerena nene, ana yaru naþa yum̃aen sanene monar visuar ruru kana þelaga na yum̃aenena.

<sup>11</sup> Naga monar taþatete liganli si þerena taþena, komin nemligan þerena napo rui, nane Yesu Kristo. <sup>12</sup> A pogos naþa amiyum̃aen yum̃a metava e þerena nena, pona laþasa amiyum̃aen

e kol pona selþa pona kilavaru m̃arera, pona laþasa amiyum̃aen e laki pona m̃aero pona m̃akururuye. <sup>13</sup> Ana siraunia, yoko kapi na legiena maro kekania kilali kiela yum̃aena lala,

kila yum̃aena la naþa akila, m̃alivi e yo metava.

<sup>14</sup> Visae kapi tol yum̃a naþa yar tai pisirlua metava e þerena nene, ana kekan þele ga, yum̃a suñalu ruru suñã ga, yoko yar nene war kiena

nalaena wo tai. <sup>15</sup> A visae yar taþena, kapi kekan make kiena yum̃aena, yoko yar nene kilalu make kiena suria. Lavis kapi nene kilia kekanm̃ar m̃ena yar na yum̃aena nene, ana pona naga purmatan kapi nene, tamalia kiena malena.

<sup>16</sup> A kam na monar avisu kilale sane yum̃a nene naþa amaplar metava e þerena nene, naga kam li nalelagaena lala, a sane yum̃a na lotena wa tai m̃ana Ntewa, naþa Ninuna suñã loyum̃a ea. <sup>17</sup> Yum̃a na lotena kiena ne Ntewa naga kam

ga ne, a visae yar tai sinenan sape kila kare yuñã nene, yoko Ntewa welua nena naga, komin kiena yuñã na lotena nene naga pe wa pañisi.

<sup>18</sup> Amiu monar ala ya naña nepisa ke ne, pe pon re asitom avisave naga pe sur korena ga. Visae amiu yar tai sitom ke sape naga pe manmarua ruru po e nakiliaena na yomarava nini, popon manene naga ligan sitomena navisokanena la nene sike na. E lepas nakiliaena na yomarava nini, naga monar kila naga sane yar ga tai naña pe wowe, ana visae naga kila sanene, yoko naga kilia ve manmarua ruruia e nakiliaena lala kiena ñe Ntewa. <sup>19</sup> E Visena Wa, tepisu visena tai naña kila meraravan sape manmaruaena na yomarava nini sane sur wowe ga e marana Ntewa, naña pisa sanini, sape

*La naña asitom ke asape la ape manmarua ruru po e yomarava nini, asitom ke asape la akilia suria, ana e marana Ntewa la ape wowe ga, naga pisu kilale la ruru rui. Sop 5:13*

<sup>20</sup> A visena tañena sina sanini, naña sape *Suñe pisu kilale ruru sitomena lala kiena li na manmaruaena la na yomarava nini, sape ape sur korena ga. Yauena 94:11*

<sup>21</sup> Sanene na, ve tevilaven re sitomena na yomarava lala. Tañatete akila sur wo tai van amiu, komin naña Ntewa kian kiena navisa ruruena wo punu ga pan amiu rui. <sup>22</sup> Inu Pol nemio Apolos a Keñas, mekila yuñãena wo punu ga pan amiu rui, a nagane yomarava nini sike e limamiu. Visae amal pona amare, visae asuñã nagane pona ase legiena naña pimi ke ga wa, ana

sur punu ga ape kiamiu rui, <sup>23</sup> a amiu ape kiena Kristo, a Kristo pe kiena ne Ntewa.

## 4

### *Yum̃aena kiena Pol amio Apolos sane nalolopena kiena Yesu*

<sup>1</sup> Sanene na, amiu ve aligan imimi re meva metava, ana popon avisu imimi sa ga yar na yum̃aena kiena Kristo lala, naña naga mligan visawanena lala kiena ne Ntewa e imimi, vena mevisawal va la naña pe akilia re poli.

<sup>2</sup> A pupia sur naña sike e kiamimi sitomena, mekiliala sane monar memasisun ruru wo e yum̃aena nene naña kiamimi yerkaawa mligan e limamimi.

<sup>3</sup> Pe nesitom manene re nesape aña amiu asitom ke sanapen inu, po yar la aliñere inu ve sanape, a in m̃ena pe nepilevilen in re sina poli nesape in na sanene pona sanene. <sup>4</sup> Lelaga, pona nepisu in ke sina ga nesape nemiyum̃ae pogaga ne, ana nanene kiau sitomena ga ne. Kiau sitomena nene tañatete kiliala kila inu nemesmesu, a Suñe ga naga pe yar naña torokin liñere inuena.

<sup>5</sup> Ve sanene na, ve tokoskosin re liñereen yar tañena, ana monar tesum̃ate Suñe wasuñe e kana legiena na liñereena nena. E pogos nene, yoko naga la sur la naña atapolou asike e yemalolo, kila naña amolue e yomerarava, a yoko la sitomwanena la naña atapolou ke e los nen yaru, kila naña amolue e maran yeririna make ga. Yoko Ntewa waveve sur la nene, ana

yoko naga vis va yeririna lala torokin ya naña naga māl e kiela malena.

<sup>6</sup> Erau lala, visen la ne nesuñña nepisa p̄isi ne, nesuñña nepisayu ke ga imimi lua Apolos ne, ana nekila sanene komin sineun nevian ruru amiu, sane ve avisusu re ve tañena e kiamiu navianena lala. Amiu lañasa apilave komin navianena na kiela p̄egasa, a asuñña apisusu ke piowa e navianena na p̄egas tañena, ana sanene na pe mesmes re poli.

<sup>7</sup> Kam punu ga maran taaga, kam na pe apo manene re taulu tañena la poli, a visae sur wo tai sike e amiu, pe kam re na amiyuññaen poli. Ntewa ga kian pan amiu sane nalaena tai, ana sanene na pe pon re si avis vilave vanon poli.

<sup>8</sup> Lelaga, nekilia nesape asuñña asitom ke asape kam na limamiu pulen sur wo lala kiena ne Ntewa rui, ana amloge po, asitom ke asape kam na ape kiena yerkawa lala na yomarava nini rui, naña akoven imimi mesike nena varau. Visae lelaga naña sane kam na ape p̄arin suñe lala kiena ne Ntewa na yomarava nini, po pañisi, ana pe nesitom re nesape sanene poli.

Ana visae pogos tai ve sanene, pona pe kam re ga poli yo, ana yoko Ntewa visu sane imimi lua m̄ena ga metorokin meto metava memio amiu vena ve suñenen kiena yeririna lala.

<sup>9</sup> Ana nagane, imimi li nalologena lala pe mesu re e yo wo na sanene poli. Sane Ntewa mligan imimi mesike laa varau tano, naña yeririna na yomarava nini amio m̄ena navisi lala apisu kare



imimi, sane metorokin ke ga yaru lala naña amla koaena na marena pan la.

<sup>10</sup> Memlogear ke Kristo, mekila ke kiena yuññaena, ana li tañena la apisu imimi sa ga mepe wowe towe ga, ana asuñña apisayu amiu asape ape manmarua ruru nena e malena kiena Kristo. Apisu sane imimi na memalum ga, ana kam na añarera. Apisu imimi piowa ga, ana amligan amiu asike metava.

<sup>11</sup> Imimi na pe sa re nena amiu poli, komin siar nanua pimi tol nagane, viso kar imimi, moto kar imimi, pe ñamimi kulsota wo re poli, mesuñña mepane ke pog ñarera lala, ñamimi yuñña wo re naña memon e poli, <sup>12</sup> ana mesuñña memal ke ga e yuññaena na limamimi. Yar la apiuelin imimi, ana mepisa ruru la ga. Akila kare imimi, ana metañan ga. <sup>13</sup> Apisa kare kiamimi kia, ana mekilali naña mepe erau ruru ga memio la. Mekila po sanene, ana akila imimi sa ga kororaki na yomarava nini. Lelaga, pimi tol nagane apisu imimi sa ga sur korena ga.

*Pol piun sape ataveve lana*

<sup>14</sup> Pogaga, pe nepisa re visena la ne ne vena kila amiu amawa poli, komin kam na sa ga naruu lala naña sineu sii amiu pañisi, a sineun nevian ruru amiu. <sup>15</sup> Nekilia nesape yerkawa tañena la mok liu naña apisuar amiu a amiila kiamiu lelagaena e Kristo, ana popon asitoñal sane inu ga taaga nepe arimamiu. In na noñar ñesan Lologena Wo kiena Kristo pimi pan amiu, ana in na sane arimamiu e kiamiu malena amio naga.

16 Sanene na, nepisu sane mesmesun ga naŕa nevis van amiu, noŕareran amiu nesape ataveveli lelen lau sumo.

17 Sitomena ne nanene kila nesape nevitetalia Timote iŕasu pun amiu. Nepisu sane Suŕe taŕan naga pan inu sa ga naruu tai, komin naga miyuŕae ruru po e yuŕaena lala a nekekanan naga paŕisi. Ana pogos naŕa visae imi ŕalivin amiu, sineun nesape naga kila amiu asitom ruru si kiau ŕelaga nayalena naŕa nataveveen Kristo, sa naŕa nesuŕa nepian ke pa yar lala na suŕare make ga la naŕa nesuŕa neteteliv ke e la. 18 Nekilia sane pogos naŕa apisu sane pe noŕalŕaliv re si pun amiu poli, kam laŕasa akilali naŕa amligan la sina asu metava.

19 Ana pogaga, komin naŕa visae Suŕe taŕan van inu, yoko ve ve piavi re neim noŕalivin amiu. E pogos ne nanene narui, yoko yepeu mavin logeen visena kiena la nene, ana sineun nesape nevisu sane kiela ŕareraena na kilaen yuŕaena ŕarera sanape.

20 Nanene komin naŕa visena kiena yaru pe pe sur re tai poli loyuŕa e nasuŕenena kiena ne Ntewa, ana ŕareraena kiena Ninuna ke narui naga pe pupia suria.

21 Pogaga, sineun nesape asitom ruru sumo, sane visae noŕalivin amiu, yoko ve sanape? Visae sinemiunia, nekilia neiŕasu pun amiu nemio kiau visena ŕarera lala na veveyuena, ana po manene laa visae akila kiamiu sitomena

la su tano sumo wa, ana nekilia neirmasu nemio ga visena la naþa malumu, e þelaga na sinesiena.

## 5

### *Pelaga viowa loyuña e suñare*

<sup>1</sup> Visena pimi tol kiligau sape sur tai sike likan amiu naþa piowa manene laa. Apisape kam yar tai, arimana pa talopa amio sira taþena, ana siraunia, yar nene pinaun wona arimana nena pimi sike amio. Lelaga kemua naþa, yaru na yemalolo lala taþatete akila þelaga nene, ana sanape na kam li nalelagaena tai suña kila?

<sup>2</sup> Kam li nalelagaena lala asuña apisir plan amiu, asape kam na amiyuñae ke po, ana sanape asuña atañan ke þelaga na sanene suña miyuñae ke likan amiu? Popon aloge viowagan sur nene, a popon akovenlua yaru nene vetan kiamiu suñare.

<sup>3</sup> Ee, lelaga naþa nagane nesike e yo nini nesike laa perinan amiu, ana e ninuu nemloge sa ga nesike ga nemio amiu. Sanene na, e kia kiena Suþe Yesu, nesuña nepisawal ke naliþereena tai kiena yar nene sa ga nesuñal ke ga nesike e maramiu. <sup>4</sup> Sanene na, pogos naþa aim si lele taaga, monar avisu sa naþa ninuu sike ga amio amiu, a monar akilia sane Suþe Yesu mēna sike amio kiena m̄areraena, <sup>5</sup> ana monar akovenlua yar nene vetan suñare. Naga monar ure sina, wasuþe si e yomarava va e limana Yermare, ana popon þelaga lala na mlamulena viowa na yomarava akila naga loge viowa vano vano-o va

ṽisi, ana suraunia pona wasuṽe si imi yo, vena Suṽe kekaran tamalia ninuna e legiena maro.

<sup>6</sup> Erau lala, pe pon re asuṽa awarwar manene amiu poli, avisave kam na amekiki, komin kororaki nene sike e amiu na wa. Kam na akilia rui sa naṽa narin is ga, ana kilia kila kilaparavi punu ga lapa. <sup>7</sup> Sanene na, popon vena awar plan is viowa nene naṽa sike e amiu, vena amiu punu ga aim aekiki ruru sina. Monar tesitoṽal sa naṽa yermarua lala asuṽa akila ke kuṽaṽaena e narin sipsip vena kilaplanen kiela mlamulena viowa lala, ana Kristo pimi mare e laki torovia vena warplanen kieta mlamulena viowa lala, ana pe pon re kororaki suṽa e ita poli.

<sup>8</sup> Ana pogos naṽa yermarua la akila kuṽaṽaena ṽisi, akila kana ṽaṽagena nena, a ita nalelagaena ṽena lala ita ṽena kieta ṽaṽagena tai. Ana pe pon re tesike e ṽaṽagena nene poli, takan kilaparavi tai naṽa is marua sike ea. Visena nene kana kinasia sane pe pon re sane mlamulena viowa a ṽelaga viowa na malena marua suṽa ga e ita, komin loyuṽa e malena na suṽare, sur make ga monar ikiki ruru wo, ve lelaga ruru wo, a ve wa ruru wo.

<sup>9</sup> Kiau visena tai pan amiu sanene rui. E ṽaki tai naṽa nesiri piṽasu pan amiu nanua rui nepisawal nesape pe pon re ava lele taaga amio yar la naṽa akila ke ṽelaga viowa la poli, pona asuṽa akiriri kar ke vanon sira lala. <sup>10</sup> Ana pona kam laṽasa amlogepal kiau visena nene yo, komin pe nepisa re e lepas kiena yar la naṽa pe amlelaga re poli. E la nene, la moki akila

kolau, la moki ape puluvis lala, la moki apinau, la moki amlotun kiela nono lala, ana visae sinetan tevisave tesu perinan la, pona monar teligan ga yomarava nini narui, komin naþa ita make ga tesike e yomarava, a tesuþa tepitawe ke yar sur na sanene silaga. <sup>11</sup> Pe nepisalupar re nene poli, naþa tesuþa tepitawe ke yar kar na sanene e kieta yalorena, ana ya naþa sineun nesape nevisa, sineun nesape visae yaru tai suþa ga, neþa naga pe nalelagaena lelaga tai, ana apisu ke naþa e kiena malena naga suþa taþa ke kolau, pona suþa pe puluvis lue ga, pona suþa mlotun ke nono lala, pona suþa piuel, pona suþa mun kuruta namunena, pona suþa pinau, ana pogaga, yar sur ne nanene narui ve akila re nena sur tai amio naga. Yoko ve ava re lavisinia, ve akinana re lele taaga amio.

<sup>12</sup> Ve sanene na, e lepas kiena la naþa asike vanua e suþare, pe pe kieta re naþa teliþere kiela malena poli, ana e lepas kiena la naþa asike loyuma e suþare, monar tevisuveve ruru la. Visae laþasa asuþa akila ke þelaga na mlamulena viowa la naþa sane nepisa ke ne, monar teliþere la, a monar tekila sur tai van la.

<sup>13</sup> Ntewa ga yoko liþere la naþa pe asu re loyuma e suþare poli,

*ana e lepas kiena yar nene naþa suþa kila ke þelaga viowa likan amiu, kam ke narui monar akoven lua naga vano. Naw 17:7*

## 6

*Pelaga wo na kilaruruen veveyuena*

<sup>1</sup> Nemloge m̃ena sane pogos tai, kieta puruvi tai na suṃare naga pepeyu amio amiu taṓena tai, ana naga suṃalu p̃ere taṓena nene pa e pupia kumali apis pania. Nepisu sane sur nene pe memes re nena poli, komin naṓa pe pon re yar la naṓa amlelaga e Ntewa ava asuṃalu e marana yerkawa la nene naṓa pe amlelaga re e Ntewa poli, vena yerkawa la nene aliṓere la.

<sup>2</sup> Pogos naṓa li nalelagaena lala aveveyu, popon li nalelagaena taṓena ga lala akila ruruia, komin naṓa monar tesitoṃal tevisave ita li nalelagaena ke la narui naṓa teliṓere yeririna lala na yomarava e legiena maro. Ana visae ita ke narui naṓa yoko tekila pupia yuṃaena na sanene, pona amiu atorokin naṓa akila ruru kiamiu narin veveyuena la ne sanene. <sup>3</sup> Yoko Ntewa ligan ita vena teliṓere navisi lala nae peni, ana pogos naṓa li nalelagaena taṓena lala avisin sur na yomarava nini, sanape? Apisu sane m̃arera paṓisi, taṓatete akila ruruia?

<sup>4</sup> Peraga, monar akila. A visae peraga, pona asitom asape popon amiu li nalelagaena lala aligan kiamiu visena e limana yar taṓena la naṓa pe asuṃa apim re e suṃare poli?

<sup>5</sup> Nepis m̃arera sanene komin naṓa sineun nesape nekila amiu amawa towe laa ga! Ee, nemilan manene paṓisi navisuen sa naṓa pe amiu re nena tai naṓa pe manmarua poli, naṓa kilia kila ruru kiamiu veveyuena la nene. <sup>6</sup> Pona sur ne nanene narui kila sane kieta puruvi taṓena na suṃare suṃalu mligan puruvi taṓena nene pa e pupia kumali, ana suṃa pisawal ke

kiena napiowaena lala e marana pupia yerkawa lala e totanoena nene, la naña pe amlelaga re e Ntewa poli?

<sup>7</sup> Nesumña nepis ke pan amiu sanene e lepas na mrapa naña monar atavevea vena kilaru-ruen veveyuena la naña sike likan amiu, ana po manene laa visae ve veveyuena re mñena ga. Veveyuena la ne sanene, kana kinasa sane Yermare sumña taulu amiu rui. Pona pe akilia re poli yo wa, naña visae womla tai kila viowa van ko, pona vinaun kioñña sur tai, ve ositom re, otañan ga, komin mlamulena viowa naga kiena.

<sup>8</sup> Ana visae osuñalu sinomñan oligan yar nene e pupia kumali vena ala nakoena vania, ko ke narui ko osuñña okila ke piowa pan womla nene.

<sup>9</sup> Monar asitoñalia sane la naña kiela malena pe memes re poli, yoko tañatete avisu nasuñenena kiena ne Ntewa imi mñalivi pu la. Pe pon re akilali akila sa naña amninue ke sur nene na wa, komin akilia rui asape Ntewa pe kekaran re nena la naña asuñña amiyaloro kar ga, pona la naña amlotun ke ga ntewa navisokanena lala, pona la naña akila ke kolau, pona la naña asuñña añiliwilin ke tasnela, pona yermene pona sira la naña asuñña añere la ke sina ga, <sup>10</sup> pona la naña asuñña apinau, pona la naña pe apion re kiela sur pa yar tañena la poli, pona la naña asuñña amun wii, pona la naña apiueli, pona la naña akila urlelai.

<sup>11</sup> Lelaga naña, nanua sumo kam lañasa akila sanene rui, ana potena pañisi naña Ninuna Wa kevan amiu amekiki, kila amiu ape wa, a kieta

Suþe Yesu Kristo kila ita temesmesu ruru sina e marana Ntewa.

*Tasneta monar ikik ruru wo*

<sup>12</sup> Nepisawal þelaga viowa la nene, naþa pe pon re tekila poli, ana yar laþasa pe sinelan re kiliaen poli. La apisa sanini, asape “E, kiau malena naþa, nekilia nekila ya naþa sineun nesape nekila.”

Ana nevisataþne la, nesape “Lelaga, pona ki-amiu malena yo, ana avisuaria, komin sur moki liu naþa sinoþnan kilaena, akilia akila kioþna malena imi viowa þena ga. Sur mok liu naþa sinoþnania osape suþna e kioþna malena, ositom osape okilia okawe ruru woga, ana peraga, yoko ovisu naþa sur ke la nene narui yoko akawe ruru si kioþna malena.”

<sup>13</sup> A yar si laþasa naþa sinelan asape akila ya naþa la sinelania e tasnela, la asuþna apisa ke visena taþena tai, asape “Kinanena, naga na mþeu, a mþeu, naga pe na kinanena.”

Ee, lelaga, ana ovisuar ruru sina, komin naþa yoko Ntewa kila sur lua nene ava akovio na wa. Sanene na, Suþe mla tasneta pan ita vena ve kieta, ana ita monar tela tasneta tela si vania. Tasneta vena kilaen kiena yuþaena, ana pe nava kareena re ga poli. <sup>14</sup> Visae tetanþan tasneta vena kilaen ga yuþaena wo lala, yoko e legiena maro Ntewa kilia visirlua si tasneta, sa naþa pisirlua tasnena ne kieta Suþe Yesu rui, e kiena pupia mþareraena. <sup>15</sup> Monar tekilia sane tasneta lala la sane komþas nen tasnena Kristo. Ana sanape, popon komþas nen tasnena ne Kristo tai va sikol



si amio sira na mrapa tai? Tařtatete ve sanene řisa!

<sup>16</sup> Ana Visena Wa pisa sanini, sape “Yoko yermene amio sira, lalua aim ave taaga,” ana yar nařa va amio sira na mrapa tai, kila nařa tasnena pimi pe taaga amio tasnena sira nene.

<sup>17</sup> Pe mesmesun re yar tai kila sanene poli, ana monar tesikol ita temio Suře, nařa ninuta imi ve taaga temio Ninuna. <sup>18</sup> Monar tevisuar ruru wo e mlamulena viowa la nařa yar la akilia akila amio tasnela, e lepas na yermene amio sira. Mlamulena viowa tařena la nařa asuņa akila, asuņa akila ke piowa ga pa e yepen yar tařena, ana yar nařa kila mlamulena viowa amio sira, suņa kila ke sina ga piowa pa e yepena.

<sup>19</sup> Ve sineta řesan re, sane tasneta na sane yuņa wa na lotena tai nařa pulen Ninuna Wa nařa Ntewa mligan sike loyuņa e ita. Ana tasneta nene, pe pe kieta re mņa poli, <sup>20</sup> ana pe kiena ne Ntewa, komin nařa naga pul lua kieta malena e marena kiena Yesu. Sanene na, monar teyuņae temio tasneta vena kilaen ga sur la nařa asuņa avisirlua kiena kia.

## 7

### *Talopaena*

<sup>1</sup> Pogaga, nagane yoko nevisawal sitomena lařasa e nařa apiun tan inu e lepas na talopaena, asape popon tetalopa, pona popon tesuņa ga sanene?

Ana pogaga, yoko nevisa ve sanini. Visae yaru tai sitom ke sape ve talopa re, naga nene pogaga, pe pe sur re tai poli. <sup>2</sup> Ana komin naþa tepisu naþa nataþaliena pimi m̃arera, a nataþaena lau pule manene la, popon manene yar make ga aure wola lala.

<sup>3</sup> Sanene na, visae yar sinenan sape va lavisin wona na sira, wona nene monar kekarania, a pogos naþa sira sinenan sape va lavisin wona na yerm̃ene, wona nene monar kekarania. <sup>4</sup> Sira naþa talopa taþatete visave tasnena pe kiena naga taaga, ana wona na yerm̃ene kilia visave naga pe kiena m̃ena ga. Ana yaru naþa talopa taþatete visave tasnena pe kiena naga taaga, ana wona na sira kilia visave naga pe kiena m̃ena ga. <sup>5</sup> Sanene na, tai ve visaluþar re taþena visave ve imi re lavisinia.

Ee, pona pogos tai lalua apisayu yo, lalua ataþan naþa lalua aligania, ve amon re lele taaga e narin pogos tai, vena kila lalua akilia alen m̃arera vanon sur tai wa, ana nanene na pogaga. Ana siraunia, lalua monar sinelan si aim lele taaga, komin visae peraga, pona Yermare visu kilale naþa tai malum ga, taþatete uarar naga, ana kila loru e nataþaliena koyo tai.

<sup>6</sup> Sur la naþa nesuþa nepisa ke ne, pe nepisa re sane navisaluaena m̃arera tai poli, sane yar monar talopa, pona monar ve talopa re, ana nemla ga sitomena naiilaena laþas nene. <sup>7</sup> Visae yar make ga akilia asuþa ga sane inu, naþa pe netalopa re poli, nesuþa ga sanene, pona yoko vera na wo na wo, ana sur nene sike ga e sitomena naþa Ntewa mlavia pan ita peve taaga.

<sup>8</sup> Nesape nevisa visena tai van la naþa asu m̃aga sanene, sane la naþa pe atalopa re poli wa, amio letano lala. Nepisu sane visae akilia asuñã ga sanene, sane naþa in m̃ena nesuñã nekila ke ne, yoko wo na wo. <sup>9</sup> Ana visae laþasa apisu sane peraga, yoko m̃arera van la vaþisi vena auarar la lue ga sanene, pogaga, po paþisi naþa visae alual tai naþa atalopa amio. Pe pon re nataþaliena suñã kar la sanene vano-o asuñã aloge viowagania silaga.

<sup>10</sup> Visena taþena si tai naþa sineun nesape nevisa, naga van la naþa atalopa rui, naþa pe kiau sitomena re ga poli, ana naga pe visena tai naþa Suþe mlavia sane visena m̃arera tai pimi pan ita. Pisa sanini, sape sira monar ve ure matan re wona na yerm̃ene. <sup>11</sup> A visae pogos tai sira tai ligan wona na yerm̃ene, ure matan sina, naga monar ve talopa re sina, ana monar suñã ga sanene. Pona visae peraga, popon naga amio wona na yerm̃ene lalua akila ruru marala, lalua asu si lele taaga. A yerm̃ene lala, ve añene plan re si wola na sira lala.

<sup>12</sup> Pogaga, yoko nevisawal si suri taþena laþasia. La pe sa re navisaluaena kiena Suþe poli, ana sane kiau sitomena ga laþasa vena iila itaena.

Suri þesia, naga e lepas naþa yaru tai naþa mlelaga e Yesu sike amio wona sira tai, ana sira nene mlelaga re poli. Ana visae sira nena kekaran ga naþa lalua asuñã veraga, po pon re yaru nene sitom sape m̃enelua si sira nene

poli. <sup>13</sup> A maran taaga m̃ena ga visae sira tai m̃elaga e Yesu sike amio wona yerm̃ene tai, ana yerm̃ene nene pe m̃elaga re poli. Visae yerm̃ene nene kekaran ga nãpa lalua asum̃a veraga, po pon re sira nene sitom sape m̃enelua si yerm̃ene nene poli. <sup>14</sup> Nanene komin naga e lalua nãpa m̃elaga kilia kila suri wo tai van nãpa pe m̃elaga re poli, ana kiena p̃elaga wo kilia kila kiela talopaena lalua imi wo vãpisi sane talopaena kiena yaru lalua nãpa am̃elaga. A naga e lalua nãpa m̃elaga kilia kila suri wo tai va narila lala, komin naga yoko kilia ligan ruru narila lala e mrapa na malena wa, yoko akapuru loyum̃a e mratava tai nãpa po sa ke ga ninis tãpena la nãpa arimala amio anela la ga luwoka am̃elaga. <sup>15</sup> Ana e lepas kiena lalua nene nãpa tai m̃elaga a tai pe m̃elaga re poli, visae nãpa pe m̃elaga re poli sinenan sape ligan lua si nãpa m̃elaga, ita li nalelagaena tãpena lala monar tetam̃an ga sanene narui. Visae nãpa pe m̃elaga re poli yepen mavin nãpa m̃elaga, tãpatete tekilali nãpa tom̃areran nãpa m̃elaga sum̃a amio wona nãpa sinenan sape ligania, komin Ntewa sinenan sape tese malena tai nãpa pulen p̃elaga na sum̃are.

<sup>16</sup> Ko sira nãpa om̃elaga, pona ko yerm̃ene nãpa om̃elaga, pona ositom osape okilia otaulu si wom̃a nãpa pe m̃elaga re poli, ana peraga, pe okilia ruru re nãpa osape yoko ve sanene poli, komin pona tãpatete nena otauluia p̃isa, peraga.

*Monar teva ruru ita tesum̃a e malena nãpa  
Ntewa mligan ita tesike ea*

<sup>17</sup> Ana ya ga naña monar tekila, ita make ga monar teligan ruru kieta malena ita punu ga su ruru e naña kieta Suþe mligan ita tesike e rui, pona monar teyali ga e mrapa naña Ntewa pio itania vena teyal ea. Nanene naga visena tai naña nemligan sike e kieta sumare lala.

<sup>18</sup> Visena nene kana kinasa sane e nape naña osike ea nanua, sumon naña omlelaga, monar okekaran osuũa ga ea wa, pogos naña osiar omlelaga. Sanene visae laþasa ape le Yu la yo, naña asuũa ataveve ke kiela þelaga marua lala, sane þaviu pona ya sina, nanene na pogaga, pe nepisa re nesape visae pogos naña alelaga ana monar avilopu kiela þelaga marua la naña asuũa ataveve ke poli. A maran taaga mēna ga sa ke la naña pe ape le Yu re poli, naña pe akila re þaviu poli ana asuũa ataveve ke kiela þelaga marua taþena lala. E mēna e kiela leþasia, pe nepisa re nesape visae alelaga monar avilopu la e kiela þelaga marua la poli.

<sup>19</sup> Yaru taveve þelaga marua ya, sane ve þaviu pona ve ve þaviu re, naga pe pe suri keviu re tai poli e navisuena kiena ne Ntewa, ana Ntewa sinenan ga sape tetaveve kiena visaluaena.

<sup>20</sup> Nane nepisa ke pan amiu narui nesape pogos naña olelaga, ova ruru ko ga osuũa e yo naña osike ea pogos naña pe omlelaga re poli wa.

<sup>21</sup> Sa ke ga naña visae omiyuũae korena kiena yaru tai nanua sumo, ana nagane omlelaga ga na wa, nanene pogaga, monar okekaran naña oyumuũae korena ga sanene. Ana lelaga, visae pog tai olual kiomuũa pulmas tai naña okilia ourmatan e naña omiyuũae korena

ke ea, naga m̃ena nene popon õpisia. <sup>22</sup> Visae ko na omiyum̃ae korena kiena yaru tai, monar ositom̃al sane pogos nãpa Sũpe vio ko, naga visirlua ko ligan ruru ko nenaga e namratava puna. Ana e kana lepas ne tai, visae ko pe omiyum̃ae korena kiena yaru tai poli, osum̃a ga sanene, ko m̃ena monar ositom̃alia ovisave pogos nãpa Kristo vio ko, ko na monar oimi sane kiena yaru na yum̃ae korenaena tai narui, vena kilaen kiena yum̃aena make ga. <sup>23</sup> Naga nene komin Kristo pul plan ita e pupia suri tai, sane kana kuruta, vena ita teve kiena, ana monar tevisu kilale ga narui sane mesmesun ga nãpa teyum̃ae koren ga vania, po pon re teyum̃ae korena van yaru tãpena poli, pona tesike vatanon sitomena kiena yaru tãpena nãpa temiyum̃ae ke pania.

<sup>24</sup> Erau lala naga ke nene narui, yo nãpa osike ea pogos nãpa pe okilia re Ntewa poli wa, yo ke nanene narui monar osum̃a ga ea, ana nagane omlelaga rui, yoko Ntewa sum̃a ga amio ko e nene silaga.

*Naviunena e lepas kiena la nãpa pe atalopa re poli wa, amio letano lala*

<sup>25</sup> Pogaga, nesape nela narin visena tai van amiu e lepas kiena la nãpa pe atalopa re poli wa. Visena nena, tãpatete nevisave nanene navisaluaena tai kiena Sũpe nãpa pisa pan inu, ana visena nene naga sane kiau sitomena ga tai. Ana kam na akilia rui sane Sũpe naga po pãpisi pan inu, naga mla manmaruaena lala pan inu nãpa yoko amiu akilia awasine ruru la, ana

popon asitom urmi e kiau visena nini narui. <sup>26</sup> Nagane, tesike e pog viowa tai naña tesuũa tepisu ke suri m̄arera la naña tepane la, ana popon nevisa si visena naña nepisa metava rui, naña nesape popon teva ruru ita tesuũa ga e malena naña tesike pae e rui. <sup>27</sup> Sanene, visae ko yaru tai naña otalopa rui omio sira tai, popon osu ruru ga osuũa sanene, ve ositom re ovisave oligan lua naga. Visae ko pe opure re sira tai poli wa, ko m̄ena ga osuũa ga sa ga nene, pe ositom re osape otalopa omio tai poli.

<sup>28</sup> Ana visae ositom sane peraga, sinoñan manene osape oure sira tai, pe nepisa re nesape piowa poli, a visae sira m̄ee tai talopa amio yaru tai, naga m̄ena nene pe sa re kiena mlamulena viowa tai poli, nanene na pogaga nene. Ana la naña sinelan talopaena, la monar avisu kilale sane yoko tařatete kiela malena memea, yoko avane pog m̄arera la ve moki vařisi e yomarava nini, a visae otaveve kiau visena, naña ve otalopa re, yoko nekekara vařisi.

<sup>29</sup> Erau lala, nepisa ke sanene komin naña narin pog plas ga sike ga wa vano-o tol pogos naña sa Suře wasuře si vitomi, a pe yaru la moki re poli na kilaen kiena yuũaena. Ve sanene popon manene visae la naña ařure wola la rui, akila sa naña pe atalopa re poli wa, ana akilia akila yuũaena lala kiena Suře ve moki. <sup>30</sup> A la m̄ena ga naña asuũa atagin ke suri tai, popon sinela řesan suri naña atagin ke ne, a la naña amloge ke pon kekarena lala na yomarava, popon ve asitom̄al re sina. La m̄ena

naþa amiyuñæen ke kilavaru, popon akila sa naþa limala korena ga. <sup>31</sup> La naþa akila yuñæena taþena lala na yomarava nini, popon akila sane pe kiela sur re tai sike e poli, komin yomarava nini amio kiena suri make ga naþa sike ea sun ke naþa yoko va kokovio narui.

<sup>32</sup> Nepisa ke visena la nene pan amiu komin nesitom amiu paþisi, pe sineun re naþa silaga aligan lue ga kiamiu sitomena se suri la ve moki poli. Yaru naþa pe wona re poli, naga kilia sitom urmi e yuñæena kiena Suþe silaga, sape yoko naga kila ve sanape naþa yoko Suþe kekarania, <sup>33</sup> ana yaru naþa sike amio wona, naga suñã sitom manene suri na yomarava la paþisi, ana kila ve sanape naþa yoko wona na sira kekarania, <sup>34</sup> a yoko kilia kila mñena sa naþa kiena sitomena la ve ve lua. A sira mñee naþa pe wona re poli, naga mñena ga kiena sitomena mñarera ruru po vena kilaen yuñæena kiena Suþe, a kiena yalena amio kiena yuñæena kilia ve wa ruru lue ga. Ana sira naþa wona suñã ga, kiena sitomena monar su ga e yuñæena na yomarava nini, sane monar kila suri la naþa wona na yermñene loge wonia. <sup>35</sup> Kiau visena la nene, pe sineun re visaluþar amiuena e suri tai poli, naþa sinemiun asape akila, ana nepisa kiau visena kilali naþa iila kiamiu malena. Sineun ga nesape suri na suñare punu ga kirir ruru wo, a sineun nesape ita li nalelagaena lala ve tekirakirai re, ana tekira tevisu ga kieta Suþe naga taaga.

<sup>36</sup> Ita laþasia akila naþa akilawo kiela sira tai,



ana asitom asape popon asutowe laa sane wa, pe asitom re talopaena poli komin naña sinelan kilaen yumãena kiena Suþe. Ana visae lala tai visu sane sitom manene la sira nene naña akilawoia, sa naña sitom manene vano-o visu sane yoko uarar þele si naga, naga popon akila ga lalua atalopa narui. Nanene naga pogaga ne, naga pe mlamulena viowa re tai nene poli þisa. <sup>37</sup> Ana visae tai kila ruru sitomena m̃arera naña m̃arera sape naga sinenan vena naga amio sira nene naña akilawoia vena ve kiena, lalua asumã sanene sumo wa, a visae naga visu kilale sane naga kilia kawean ruruia, nanene naga kila po paþisi visae ve talopa re ga amio wona nene rui. <sup>38</sup> Sanene, naga naña talopa mare ga amio naga naña akilawoia asape ve kiena, naga kila suri wo tanea tai paþisi, a naga naña sumã ga, pe talopa re amio naña apisawo poli, naga kila sur tai naña po manene laa sane. <sup>39</sup> E lepas kiena la naña atalopa rui, monar ve aure matan la re sina. Sira naña talopa naga monar su ruru ga amio wona na yermene naña wona nene mali ke ga wa. Ana visae yaru nene mare, sira nena kilia talopa sina, akilia talopa amio yaru tai naña naga sinenania, ana monar ure ga naña naga m̃ena mlelaga e Suþe. <sup>40</sup> Sanena naña nepisa ke ne, naga kilia talopa, ana nepisu sane yoko wo laa vania, pona kiena kekarena keviu laa sane, visae naga ve talopa re sina. Nanene inu ga kiau sitomena, ana nesitom nesape Ninuna Ntewa ga mla sitomena marua la nene pan inu, ana popon asitomruruia.

## 8

*Sanapen tata la naña aňemaria pe na kilaen lotena van nono lala?*

<sup>1</sup> Nagane sineun visataňeen kiamiu naviunena e lepas na tata la naña yar la naña pe amlelaga re poli akuřařain la ke pan kiela nono lala. Ana amiu asuňa apiun ke asape popon ita li nalelagaena la takan tata la nene, pona peraga?

Pogaga, yoko kiau navisataňeena visayu sur ve lua, řelaga na kiliaena, a řelaga na sinesiena. E lepas na kiliaena, yar la mok liu naña la asape akilia ruru navisataňeena na kiamiu naviunena nene, a akilia avilaven towe mąaga naña asitom asape akilia suria. Pelaga na kiliaena kilia kila yaru ligan kiena sitomena va metava, ana řelaga na sinesiena pe sa re nene poli, suňa miila ruru ke ga malena kiena yaru. <sup>2</sup> Yaru naña sitom manene ke sape naga tol ruru řelaga na kiliaena, naga pe kilia ruru re Ntewa poli wa sane popon kilia naga. <sup>3</sup> Ana yaru naña tol ruru řelaga na sinesiena, naga ke narui naña Ntewa pisu kilale ruru naga.

<sup>4</sup> Pogaga, nane kiau visena lua si ne nanene narui, e lepas na tata la naña akuřařain pa nono lala. Suri na sumo pisa sanini, sape akilia asape sane nono la nene ape totou ga, a pe ape totou na sur lelaga re nena tai poli. A sur na lua naga sanini, sane kieta Ntewa naga taaga nena naña pe lelaga sike na. <sup>5</sup> Yar la asuňa apisayu ke kiela ntewa tařena lala pona kiela suře tařena lala naña asape asike ma e peni pona e yomarava nini, a apisayula ke sa ga la yo pulen la ga asuňa

ga, <sup>6</sup> ana e ita, tekilia ruru tesape Ntewa na taaga ga suña ga. Naga nane Ata Ntewa, naña naga pe purpes nen sur make ga, naña ita tepe kiena. A Supe taaga ga naña sike na, nane Yesu Kristo, naña naga sii make suria, a naña temal ke mēna ga e naga.

<sup>7</sup> Naga nene kiliaena napo naña ita li nalelagaena la moki tetol rui, ana sur tai piowa ga, ita lañasa pe tekilia ruru re sur la nene poli wa. La nene, nanua sumo la mēna asuña amlotun nono lala, ana pimi tol pñane, mārera pañisi naña avisu kilalea sane naga nene pe sur na visokanen ga. Sanene na pogos naña yaru la akukin tata la naña akila kuñapaena ea pa nono lala, tekilia takania sa ga pe pe sur re tai poli, ana ita tañena la nene, pogos naña akania, akan amio sitomena naña asape tata nene naga kana nono lala, a siraunia yepela pñilinia, amloge sane akila sur tai naña pe mesmes re poli e marana Ntewa.

<sup>8</sup> Ana monar tekilia sane kinanena, naga pe pe sur re tai naña kilia kila Ntewa visu ita sane topo pona tepiowa. Visae ve takan re tata nene, pe kana kinas re nane topo e kiena navisuena poli, pona visae takania, pe kana kinas re nane tepiowa poli.

<sup>9</sup> Sike ga e ita visae sinetan takania pona yepeta mavin kanena, ana pe pon re tekila sur tai naña nalelagaena tañena sitom sape pe mesmesun re kilaen poli. Pona ita tekilia tekila sur nena woga ga yo, ana pe pon re naga visu naña tekila poli, ana kila kare kiena sitomena.

<sup>10</sup> Sane e lepas na tata la nene, pona e kionña sitomena, okilia okan woga yo, ana okilia okila

pe pe sur re tai poli. Ana visae pogos tai osike omio yar lala loyũa e kiela yũa na lotunen nono lala, ana ala tata van ko ana okan omio la, yoko ve sanape naþa visae nalelagaena taþena tai visu ko? Pona naga tai naþa pisaar pisape naga mlon ke tata la nene yo, ana pogos naþa naga pisu ke naþa okania, yoko naga visave “Suwala, yar nene naga pe yar na sumare tai naþa kilia ruru suria, ana naga sumã kan ke ga tata la nene. Sanape, popon in m̃ena ga nakania.” Naga pisa sanene narui, ana naga m̃ena ga kania, ana siraunia yoko kilia loge viowagania vaþisi komin naþa sitom sape naga kila pupia mlamulen viowa tai.

<sup>11</sup> Naga nene kana kinasa sane ko na osuũa otaveve ke kioũa kiliaena napo, opisu kilale sane okilia okila sur nene. Ana monar ositom ovisaye yar taþena nene, naþa naga pe womla tai naþa Kristo mare vena tamalia naga, naga maraun kilaen paþisi. Sanene, visae naga visu naþa okila pogos tai, yoko kilia kila naþa okila kare nena kiena naviawaena. <sup>12</sup> Visae ve sanene, yoko Ntewa visu ko sane ko ke narui okila mlamulena viowa pa womla nene, komin naþa okila naga kila sur tai naþa e kiena sitomena piowagan kilaena. Naga nene piowa ga, sane okila ke ga mlamulena piowa pan Kristo.

<sup>13</sup> Komin sur nene, in na nekila kiau sitomena tai, sane visae kiau þelaga na kanen tata nene naga pe sur tai naþa kila kare naviawaena kiena wolai nene, yoko neligan ga narui. Ve netol re sina, komin naþa yepmavin naþa in ke narui nekila wolai nene loru.

## 9

*Pol pisayu kiena ðelaga na yuũaena*

<sup>1</sup> Erau lala, sineun nevisa van amiu nevisave in na pe nesu re vatanon e sitomena kiena yar taþena poli, ana nemiyuũae taveve ke ga ya naþa nekilia nesape mesmesun nakilaena. In na nepe nalogena tai naþa nepisu kieta Suþe Yesu e kilamarau, a amiu ke narui naþa sane mras nen kiena yuũaena naþa nemiyuũaenia.

<sup>2</sup> Nekilia nesape yar la þasia yepela mavin visu kilale inena sane nepe nalogena tai, ana amiu na pe sa re nene poli. Nagane kiamiu malena su ruru sike amio Suþe rui, a sur nene kila apisu kilale asape nemiyuũae ke pan amiu sane nepe kiena nalogena lelaga tai.

<sup>3</sup> Ana e la naþa sinelan liþere inena sane asape nekila ke piowa sanene sanene, kiau navisataũaena la suũa ga. <sup>4</sup> Nekilia sane asape asuũa apisuar imimi pano-o sinela mare, ana sanape? Apisuarũa taþena la nanua sumo ne, ana pe apis re sanene poli, ana pogos naþa nepimi, apisa sur taþena narui. Pona asitom asape visae ve mekinana re pona ve momun re ana mekilia memal ga ve sanene vena kilaen yuũaena pula?

<sup>5</sup> A apisayu imimi laþas naþa atalopa rui, apiun asape komin ya ne wolaũaena la apim asuũa ataveve imimi? Ana ane sape nene naga piowa ga? Nalogena taþena la ne apim þesa, amio wenla Suþe lala, amio Keþas, pogos naþa amiyalin ke yuũaena sanene, wola na sira lala

asumã ataveve la, ana e poglis nene, yar la nene pe apisa re sur tai e lepas nene poli.

<sup>6</sup> Ana asape avisaluþar imimi ke sina ga ve meyuñãen re kilavaru vena ulen kiamimi suri lala. Visae imimi lua Panaþas ve meyuñãe re ga woga ga rui, ana komin ya ne apisa ke ga sanene pan imimi lua Panaþas, ana pe apisa re pan taþena la poli?

<sup>7</sup> Asitomyuli yaru na mara lala na purvanua taþena tai. Pogos naþa apanon mara, ana ane pul ke kiela sur lala? La ga apulia, pona kiela þarin suþe naga pisuvevea? A asitomyuli la naþa amapla kinanena e lokove. Visae akinana e lokove nene, taþatete yar tai vis van la vanonia. A sanapen mñena yar naþa pagan ke surmal lala? Pona naga pe kanli re nena kala tata ne tai poli yo?

<sup>8</sup> Nepisa sur la nene vena kila amiu avisu kilale sa naþa visae yar tai kila yuñãena tai, popon yar la naþa naga miyuñãe kiela monar avisuar ruruia. A nepisa sanene, pe molue re ga e kiau sitomena poli, ana kieta navisaluaena wa pisayu mñena ga sanene. <sup>9</sup> Visena tai sike loyuñã e navisaluaena kiena Mosis rui, naþa pisa sanini, sape

*Pogos naþa kiomã puluk tai sumã yaloro ke metava e kiomã mralaki sane kona vena vie plan kurusnela, ve oviar re gona, ana monar otamãan naga yaloro ea ana kinana lilue mñaga vano.* *Naw 25:4*

Pogos naþa Ntewa pisa visena nene narui naga pe sumã sitoñal re sur mal la poli, <sup>10</sup> ana

naga sitomãl ita naþa temiyumãe, sape la naþa temiyumãe kiela, monar avisuar ruru ita. Yaru naþa miyumãe e porotano, mesmesun naþa naga sitom visave pogos tai yoko kan ya naþa naga mapila, a yar naþa va lokove war kinanena vitomi, mesmesun naþa naga m̃ena sitom visave yoko atamãn ve tokaki vania. <sup>11</sup> Ana e lepas na kiamimi yumãena pun amiu, memapila mras wo la mok liu rui e kiamiu malena, ana popon vena amiu akekaran naþa avisuar imimi a akian navisa ruruena laþas naþa Ntewa mligan e limamiu van imimi. <sup>12</sup> Amiu asumã amiila ke yar taþena laþasa sanene rui, ana popon akekaran manene laa sane nakilaen wo van imimi naþa imimi mekila þesan po pan amiu sumo rui.

Ee, popon akila sanene van imimi, ana tol nagane pe mepisa re nena pan amiu mesape monar akila. Memaraun mesape sa þisi mevisawal sanene þisa, yoko asitom viowa e imimi narui, sa þisi kilawo lawe mrapa na Lologena Wo imi pun amiu. Kila narui mepis re si poli, a visae meloge viowagan naþa pe apisuar imimi re poli, pogaga.

<sup>13</sup> Ana popon asitomyuli m̃ena ga sane e Yumã Wa m̃ana Ntewa, la naþa amiyumãe ke loyumã ea amio li na kuþaþaena lala, asumã akan ke sur la nene, a asumã amal ke e sur la naþa yar la amla ke sane kiela nalaena pa Ntewa. <sup>14</sup> A Suþe pisawal m̃ena ga sa ke nene e lepas kiena ne kiena yeririna la naþa asumã amlologon ke Lologena Wo. La m̃ena ga, mesmesun naþa

akilia amal e nalaena la naña yaru la ne amloge ke Lologena Wo nene asumã ala van la.

<sup>15</sup> Pogaga, in na yar la ne tai ne sanene, ana siar nanua sumo pimi pe nepisali re nesape yar la monar ala sur tai sanene van inu poli, pona monar akila ve sanape na van inu. A nesumã nepisakol ke ga sur la ne e mñaki nini, pe naga re ga naña nesape neviun sur tai tan amiu poli. Pe sineun re nesape asiar naña ala sur van inu poli, ana añarwar amiu asape amiu ke narui apagan inu, ana sineun nesape in na nekilia nesumã nowarwar inun nesape Ntewa ga sumã pisuar inu silaga. Pogos naña nekilia nesape kiau malena sike ga e limana, nesumã nemloge po pañisi, a visae ve naga re naña sumã visuar inu, pona yoko neloge sane popon sa nemarpan ga rui. <sup>16</sup> Nesape noñarwar inun naña naga pisuar inu sanene pogos naña nemlologon ke kiena Lologena Wo, ana e lepas na pun inu, lelaga pañisi pe sur re tai naña nekilia noñarwar inun poli. Tařatete nevisirlua si kiau kia va metava, nesape in ke narui nepe yar na lologonen Lologena Wo, vanon Ntewa ke narui naga mligan e lumãu, ana nepisu sane monar nekila ga narui. Visae pogos tai nourenia ve nekila re sina, yoko viowa van inu vañisi. <sup>17</sup> Visae nekila ke yumãena nene e ga e kiau sitomena tai, inu ga nesape popon nekila, vena Ntewa kekarania, pona yoko kilia la nalaena tai van inu komin yo, ana pe sa re nene poli. Pe inu re naña nesitom nesape nekila poli, ana Ntewa ga pisawalia, mligan e lumãu, ana monar



nelogearia, nekila ga ve sanene narui. <sup>18</sup> Ana sanene, nesitom ðele nesape nela nalaena tai vanonia, ana naga nene pogaga, komin naða Ntewa suña kila ke sur taþena tai sane pul inu e sur wo tai rui. Sur nena, naga pupia nalogewoena nene naða netolia, pogos naða nesuña nemlologon ke lologena wo pa yar lala, naða nekila korenan ga sanene pan la. Pona nekilia nevisa van la nevisave ala sur van inu vanonia, pona avisuar ruru inu e pogos naða nemiyuñae ke sanene, ana pe sineun re nene poli, sineun nesape akilia atol ga sa ga nene, pe suri tai suwo la re poli.

*Pol naga miyuñae korena ga pa yaru lala sane nalologena wo tai kiena ne Ntewa*

<sup>19</sup> Sitomena ne nanene sike e inu, a nesuña nemiyuñae ke e þelaga tai naða yoko nevisa meraravan van amiu nagane.

Sane, inu na pe nemiyuñae kiena yar re tai poli, a pe yar re tai naða pe yer kawan inu poli, ana inu na nekila inu nepimi sane yar na yuñae korena van yar taþena lala, vena kila sane nekilia netaulu la ve moki aimi alelaga.

<sup>20</sup> E lepas kiena ne le Yu lala, nesuña nekila inu nepim nepe yere Yu nena napo, vena kila sane nekilia noure laþasia aimi.

E lepas kiena ne la naða pe ape Yu re poli, ana ataveve ke navisaluaena kiena Mosis, nesuña nekila inu nepim sane yar tai naða nataveveen mēna ga navisaluaena nene. Pe nepisu re sane nesike vatanon navisaluaena nene poli, ana

nekekaran naþa nevatanonia ve sanene, vena tauluen la nene naþa sinelan suen vatanonia.

<sup>21</sup> E lepas kiena taþena la naþa pe ape Yu re poli, naþa pe ataveve re navisaluaena kiena Mosis poli, nesuþa nekila inu neve taaga nemio la, komin nesape netaulu la mþena ga. Pe nepisa re nesape nesuþa nekilaro navisaluaena marua kiena ne Ntewa poli, peraga, ana pogos naþa nesike nemio la, nesuþa netaveve ke navisaluaena viu kiena Kristo vena kilia kila la alual malena.

<sup>22</sup> E lepas kiena ne la naþa nepisu sane pe asuþal ruru re mþarera poli, pe nepis mþarera re pan la poli, ana nekila ke sa naþa in mþena nemio la, nesuþa nemiila la, vena pona netaulu la yo.

Sanene, inu na nesuþa netaveve ke mrapa make ga nakilaen suri make ga naþa nekilia nekila van yaru make ga, vena kilaen sanene vano yoko nekilia netamalia laþasa aimi alelaga e Yesu.

<sup>23</sup> Nekila sanene, pe nekila re ga pan inu poli, pona vanon suri taþena tai, ana nekila vanon ga naþa sineun nesape Lologena Wo monar war mrasa e malena kiena yaru lala, a pogos naþa nepisu navisa ruruena naþa Lologena Wo kila pan la, nemloge po na po.

<sup>24</sup> Asitomyuli pogos naþa yaru na kiririena lala akiriri ke veraga. E pogos nene, la make ga monar akilali naþa akiriri koskos veraga avano, ana la ve via aim þes vamon la, a kilia taulu taþena lala? Yoko ve taaga kilia koven make laþasa, kiriri vano yuve la, la kiena nalaena vanonia. Ve sanene narui, kam make ga

monar aņareran yuņaena kiena Suņe, monar aņareran akiriri avano vena ala kiamiu nalaena.

<sup>25</sup> Yar na kirakiraena la asuņa aņion ruru la silaga, a asuņa apalia ke suri make ga la naņa kilia kila tasnela ve mārera ruru re. Asuņa akila ke sanene komin kiela sitomena lala māreran sape monar atauluia, atol nalaena. Ana pogos natelannen meme e yaru na kirakiraena la nene, yam plas ga meme la nene piyowa sina, ana meme naņa popon toņion naņa atelan e ita, naga yoko sike sike nena.

<sup>26</sup> Sanene, in na nekila ke sanene narui e yuņaena kiena Suņe naņa nekila ke ne. Pe nekiriri koren kar re ga poli, a pe nekirakirai re ga sanene poli, <sup>27</sup> ana nesuņa nakawean inu, nesuņa nepisuar ruru tasneu silaga, komin naņa pe pon re nesuņa nelologo ruru van yaru lala, nesape la sanene, sanene, ana siraunia, in ke narui nekila pal mrapa, pona pe netorokin re naņa nekila make ruru kiririena naņa nekiriri ke ea.

## 10

*La naņa asitom asape la amesmesu rui, akilia akila pal mrapa, sa naņa apua kana le Yu la akila sumo rui*

<sup>1</sup> Erau lala, popon tesitomyuli ya naņa kata apua la akila. Naga nene e pogos naņa yermarua Mosis sumon la amolue gar Isip, amio naga ataveve lul nene naņa suņa sumon la apa akusro pupia sive nene naņa mliņere pan la. <sup>2</sup> Aņal pogos mārera laa nene, ana Mosis ãere la apa aņarpoyo ea, ana apim sane ape kiena yeririna

kemua lelaga. <sup>3</sup> Kas moki asumã amialoro ke e yokorena, la make ga akan kinanena nene naþa Ntewa kian pan la, <sup>4</sup> a pogos naþa moto kar la, Ntewa kila wii kate e pulus nen kilavaru nene vena amunia. E poglis nene, sane Kristo ga sike amio la, sumã pisuar ruru la e sur make ga.

<sup>5</sup> Ntewa kila mña po pan la sanene pano-o, ana yepela mavin sumãlen mñarera se ea. Apilon mñasila pania, ana naga pe tamãan la re apa loyumã e yo naþa naga pisaar pan la poli, kila naþa asumã amarmare tetai kar ga e yomema.

<sup>6</sup> Ana ita nagane, pe pon re teve þarmãrera ve sa repita la nene poli, ana visae tesitom ruru e ya naþa pimi paemen la, kilia vian ita ea.

<sup>7</sup> Visae ve sanene, monar ve teligan re sur taþena sumon Ntewa e kieta malena, sane nono tai naþa telotunia, sa naþa repita la nene akila. Visena tai naþa pisayu kiela þelaga e poglis nene, pisape  
*“La pe asitom re si sur taþena poli, sinelan ga kilaen þaþagena, amun wii marala tetelivi, a aþure mña sira lala e wolena lala, naga ga nene.”*

*Nau 32:6*

<sup>8</sup> La asitom asape malena wo ne nanene narui, ana ve sineta þesan re legiena nene naþa Ntewa kila lomãara viowa la apim akar yermene lala amio sira lala naþa akila lau, ana e legiena taaga ga nene la manu lualima yam lua pa telu [23,000] amare veraga e legiena taaga, sane kiela nakoena mñarera tai. Visae ve sanene monar tevisuar ruruia, pe pon re ita laþasa ava kar ga sanene poli. <sup>9</sup> Yar naþa pilave, kila mlamulena viowa sanene, a naga sitom sape pogaga ne, ana sumã miyur kare Suþe paþisi. Yoko Suþe kilia

kila sur tai vania, yoko yar nene ilania, lom̃ara iminia sane yar na sumo la nene.

<sup>10</sup> A pe pon re tevismumun Ntewa poli, sane la naṓa asuṓa akila nanua sumo e pogos kiena kata apua lala. E poglis nene, Ntewa pite-talia navisi tai na visaaren marena pimi pula, m̃emoṓar la.

<sup>11</sup> Tepisu naṓa la asuṓa akila ke mlamulena viowa sanene, ana tepisu naṓa nakoena pimi m̃alivin la ke sanene, ana pe suri tai naweṓeṓe itaena. La asirilua kana suniena nena nakonua konua rui, ana tekilia tesitomyu si suri nene naganane, e legiena maro la ne tesike e ne. <sup>12</sup> Sanene, visae yar tai visuveve si kiena malena naga taaga, a sitom sape naga suṓa suṓalu ruru ke m̃arera rui, popon naga visuar ruruia, komin viowagan naṓa visae naga kila si viowa pogos tai, ana loru.

<sup>13</sup> Apisu nakilaliena la imi, ana ve sinemiu kurkur manene re. Pe kam re ga apane ke nataṓaliena la nene poli, ana asuṓa aṓalivi ke e malena kiena ne yaru make ga. Ana akilia awasine Ntewa, komin naṓa yoko naga taṓatete kila ko ovane nataṓaliena naṓa ko pe otorokin re otaulu poli, ana pogos naṓa nataṓaliena imi kilali ko, yoko naga vian kon kiom̃a mrapa naṓareraena naṓa nasuwoen nataṓaliena, vano-o oure matan naṓareraena na taṓaliena nene.

<sup>14</sup> Kiau erau wo lala, monar ve ava re nena lavisin ṓelaga naṓa yar la asuṓa amlotun ke nono na visokanena lala. <sup>15</sup> Nekilia nesape kam na yar sur la naṓa akilia suria, ana pogos naṓa

nepisaar mesmesun nena pan amiu sanene, nemlelaga nesape kam na amninu kilale ya naña nesumña nepisa ke ne. <sup>16</sup> Nepisa visena la nene komin naña pogos na ova oyakol amio yar la naña asumña amlotun ke nono tai, sa ga naña ko mñaena omlotun ke nono nene narui. Naga nene maran taaga amio ita la naña temlelaga ke e Kristo. E pogos na pñapagena wa, temlenin namunena wa, temlavia, a na nene sa naña ita tepisawal tesape tesikol ita e pñegas kiena yar la naña kana kuruta mlau komin la. Ana siraunia, takawero kilaparavi wa, temlavia, a na nene sa naña ita temio la naña akila kare tasnena naña tamalele metava e lak torovia.

<sup>17</sup> Nanene lelaga pan ita punu ga naña tesumña tepim lele taaga e pñapagena wa nene, komin naña tepim sane pñegas taaga, a takan pae ga kilaparavi taaga nene.

<sup>18</sup> A sa ke mñaena ga nene pa le Israel lala, pogos naña amñemoñar suri na kuñapaena lala. Lañasa pe akila re kuñapaena poli, ana akekanan kanen tata na kuñapaena nene naña yaru tañena ga la akila, ana kila sa naña ape pñegas taaga naña akila lotena na sanene pan Ntewa.

<sup>19</sup> Pogaga, visena la nene kana kinas na ya? Nesumña nepisayu ke nono lala amio nakuñapaena la nene, ana e kiau sitomena kana kinas pe nepisa re nesape sur la nene na lelaga poli, pona apowo liu. <sup>20</sup> Pe sa re nena nene poli, ana popon nekila meraravan van amiu, nesape la naña akila ke lotena kar la ne sanene, pe

amlelaga re e Kristo poli, a kuṕaṕaena la naṕa asuṕa akila ke ne, pe asuṕa akila re pa Ntewa lelaga poli, ana asuṕa akila ke ga pa yermare lala. Sanene, pe pon re ava lavisin la naṕa asuṕa akila ke poli, komin pe sineun re nesape asikol amiu amio yermare la poli. <sup>21</sup> Ko naṕa ototano ke e lele na kinanena kiena Suṕe, osuṕa omun ke e ṕana piala wa, a osuṕa okan ke kana kinanena wa, taṕatete okilia ova ototano e lelen kinanena kiena yermare lala vena omun kiela namunena a okan kiela kinanena. <sup>22</sup> Yar na kila sanene naga suṕa miyur ke Suṕe, kilia kila Suṕe vielue vaṕisi, sinena karia. A pona yar nene sitom ke sape visae Suṕe sinena kar sanene, pe pe sur re tai poli, komin naga ṕarera manene taulu Suṕe? Pe nesitom re nena sanene poli.

*Li nalelagaena lala monar ve akila re sur naṕa kilia kila li nalelagaena taṕena lala aloge viowa*

<sup>23</sup> Visena tai suṕa ga, naṕa yar la mokliu apisa apisape, yaru kilia kila ga ya naṕa naga sinenan sape kila. Pona visena nene pe lelaga yo, ana sur laṕasa sike na naṕa nekilia nekila, ana yepmavin ga kilaena, komin e kiau navisuena, la pe asuṕa amiila inu re e kiau malena poli, a pe asuṕa amiila re malena kiena yar la naṕa asike lavisin inu poli. <sup>24</sup> Nepisa sanene komin naṕa pe pon re yar tai suṕa sitoṕal ga naga taaga poli, ana monar sitoṕal ṕena yeririna la naṕa naga sike lavisin la.

<sup>25</sup> Pogaga, nagane yoko nevisa sur laṕasa e lepas na tata na sur mali lala naṕa akila

kuḗpaḗaena ea pan kiela nono na visokanena lala. Visae awar tata la nene imi, aligan su amio tata taḗena lala, vena awilwilin la, tekilia toulia takan woga ga. Nanene komin naḗa taḗatete tekilia tevisu kilale sane tata na ya la ne sanene, tesape tata ya naḗa akila kuḗpaḗaena ea, pona tata ya naḗa pe akila re kuḗpaḗaena e poli, ana ve tesitom manene re, ve teviun re, toul ga narui. <sup>26</sup> Telavia, takania, komin naḗa sane visena tai pisa sanini sape yomarava nini,

*amio sur make ga naḗa sike ea, naga pe kiena ai?  
Naga pe kiena kieta Suḗe. Yauena 24:1*

<sup>27</sup> A visae yaru tai naḗa pe mlelaga re poli, vio ko vena ova okinana e mḗana yuḗa, pona omaraun vaena yo, osumḗa ositom ke osape pona awar kinanena laḗasa van ko naḗa akila pae lotena na kiela nono la e yo rui. Ana peraga, visae osumḗa ositom ke naḗa ovano, ova ga, a ve oviun re naviunena sanene, ola ga ya naḗa visae ala van ko. <sup>28</sup> Ana sur ga tai, visae ova osike pae e naḗa rui, a nalelagaena taḗena tai teke ea, ana pona naga visa van ko sanini, visave Wolai, tata nene, italua monar telonia, komin nekilia rui nesape akila pae e rui pa kiela nono lala. Visae naga visa ve sanene van ko, ana sanene yoko ko mḗena ga ve okan re. <sup>29</sup> Lelaga, e lepas na kioḗa sitomena, okekarana ga kanena, ana e lepas na womla taḗena nene naḗa pisa sur nene pan ko, viowa vania, ana pe pon re si otol poli, komin visae peraga, yoko okila sur tai naḗa kiena sitomena pe mesmesun re nenaga ḗisa.

Ana visae ko ga taaga, a pe yar tai pisawal re



sur la sanene pan ko poli, okilia okila ya naña ko sinomñan osape okilia okila.

Nane kiau sitomena sanene e lepas nene. Nesitom nesape pe mesmesun re naña yaru taña ga kilia mñareran inu visave monar nekila nene, pona ve nekila re nene. <sup>30</sup> Visae kinanena ya, nevisu sane visae nelenwo sumo, yoko nekilia nakania woga ga. Pe pon re yaru taña sinena karinun poli, naña nakan ke tata naña nepisa potena pa Ntewa vanon rui.

<sup>31</sup> Pogaga, naga kana kinasana sanini, sane visae tekan suri tai, pona tomun sur tai, pona ya si naña tekilia tekila, ana monar tekila make ga e pelaga tai na visirluaen kia kiena ne Ntewa.

<sup>32</sup> Pe pon re akila sur naña kila kare sitomena kiena le Yu la poli, pona le Kris lala, pona kieta li nalelagaena taña laña, <sup>33</sup> ana popon amiu akilali sa naña in na nesumña nekila ke pan la. E sur make ga naña nesumña nekila, pe nekilali re ya naña yoko wo van inu poli, ana noñikeyon naña wo van la, vena kila sane pona laña akilia atol natamaliaena.

## 11

<sup>1</sup> Lelaga erau lala, sa naña nesumña nekilali ke naña neyaloro nelilu lana Kristo, popon akilali ayaloro alilu lelen lau.

*Pelaga wo kiena yeririna la pogos naña ava e sumare*

<sup>2</sup> Erau lala, nemloge sane asumña asitoñal ke yumñaena la naña nekila pan amiu na wa, a

asumã atarar ruru ke ðelaga lala na yumãena nene naþa nepian amiyunia. <sup>3</sup> Ana e sur la nene, tai sike ga wa naþa sineun nesape monar akilia ruruia, naþa pisayu yermene amio sira, naþa lalua kiela yumãena pe maran taaga re poli. Sa naþa Ata Ntewa naga pe þarun Kristo, a Kristo naga pe þarun yaru, ana yermene naga pe þarun wona.

<sup>4</sup> Ana taveve kieta ðelaga, visae yar tai lotu, pona visi e marana li nalelagaena lala, naga monar ve yan re karo na þarina e þarina. Visae naga yania, tevisu naga sane wowe tai naþa mninue ðelaga na vatanoena. <sup>5</sup> Ana sira lala na pe taþena. Visae sira tai lotu, pona visi e marana li nalelagaena lala, tepisu sane popon naga yenwo þarina e karo na þarina pona kulmrae tai. Visae ve yenwo re þarina sanene, naga mnea ga kila piowa, tepisu naga maran taaga visae akervan þarina ve þarmu ga rui sumãl se maran yaru lala. <sup>6</sup> Visae sira tai ve þarmarera, yepen mavin kaloen þarina sanene, popon avisa vania avisave popon naga kervan vilþarina, ana yoko kilia sumãl ga na wa su loyuma e sumare ana lotu. Ana yoko naga mawa vaþisi nakilaen sur nene, komin pe pon re sira la aweroro vilþarila ve plalas manene poli, pona akervan þarila ve þarmu. A visae ve sur na kilaen sira mawa sanene, popon sira la akekan tararen kieta ðelaga na vatanoena, monar ayenwo þarila la sanene pogos naþa aim alotu e sumare.

<sup>7</sup> Ana komin ya ne yermene lala la monar ve ayenwo re þarila lala? Nanene komin Ntewa sike metava, a naga pe þar pa rui, ana naga

kila yerm̃ene sane naga, pisirlua yerm̃ene kila naga pe ƣarun sira. Nane sa ke nene narui, yerm̃ene taƣatete kalo ƣarina, ana sira monar kalo ƣarina. <sup>8</sup> Tekilia sane yerm̃ene naga monar ve ƣarin sira sanene, komin Ntewa sii ƣesan yerm̃ene, siraunia sii sira molue kome lepas nen yerm̃ene, ana pe sii re yerm̃ene molue kome sira poli, <sup>9</sup> a naga sii sira vena iilaen yerm̃ene, pe sii re yerm̃ene poli vena iilaen sira. <sup>10</sup> Sanene, sira monar kalo ƣarina, vena kilaen sa naƣa naga patanon ke wona. Ana pogos naƣa naga kila sanene, navisi lala nae ma e peni apisuia, a kila naƣa apisu kilale sa naƣa sira kekaran vatanonen wona na yerm̃ene, a la m̃ena monar akekaran vatanonen kiela yerkawa keviu naƣa Ntewa. <sup>11</sup> Lelaga naƣa sira monar vatanon yerm̃ene sanene, ana nanene kana kinasa sane pe sa re naƣa sane lalua pe atoroki re poli. Ita naƣa tesike loyuma e ƣegas nen kieta Suƣe, tekilia rui tesape sira na taƣatete suma naga taaga, a yerm̃ene taƣatete suma naga taaga, ana lalua monar suma ayuma e lele taaga vena aiila la maran ve taaga. <sup>12</sup> Nanua sumo la e nasiiena, sira nasumo molue e tasnena yerm̃ene, ana siraun na nene, yeririna punu ga amolue akome tas nen sira tol nagane, ana tekilia tesape purƣes kemua lelaga, naƣa sur punu ga molue komea, naga Ntewa ga.

<sup>13</sup> Pona laƣasa pe akekaran re kiau visena poli yo, naƣa nesape popon sira lotu monar kalo ƣarina, ana asitomyu rurulia. E kiamiu navisuena, apisu sane sira naƣa ve kalo re

řarina, mesmesun ga nařa suřalu lotu va Ntewa? Peraga, e kieta řelaga na pe mesmes re poli. <sup>14</sup> E kieta malena na yomarava nini, merarava ruru pan ita rui sane pogos nařa yermene ligan vilřarina kapuru vim ve piyavi manenea, piowa pan pařisi. <sup>15</sup> Ana pogos nařa sira tařan vilřarina ve piyavi ruruia, po pan pařisi, a viluna na piyavi ne, Ntewa mla pania sane sur tai nařa miyowauia ruru yepena.

<sup>16</sup> Ana sa nařa nepisa, li nalelagaena lařas asumã apisliu, pe akekaran re sitomena nene poli, sane sira nařa sinenan sape lotu monar kalo řarina. Pogaga, kiau visena sanini, nesape imimi li nalologena lala, memlologon ga sanene, pe mekekaran re řelaga tařena poli, a suřare kiena ne Ntewa tařena la ne asike ne, la mrena ga asape ve sa nene.

### *Mrapa mesmesu nakilaen řařagena wa*

<sup>17</sup> Sur si tai sike ga wa nařa sineun nela sitomena lařasa ea van amiu. A piowa ga, komin nařa naga pe pe sur re tai nařa nekilia nevisir plan amiun poli, ana naga pe sur tai nařa monar nevis van amiunia. Naga e lepas na pogos na suřare, nařa popon vena sur tai naiilaen kiamiu malena, ana akila sa nařa pimi pe purřes nen sur viowa si tai. <sup>18</sup> Nepisa sanene komin nařa nemloge rui sane pogos nařa amiu li nalelagaena lala apim lele taaga, pe ape taaga re poli, ana nalipereena suřa pa ke metava likan amiu. Visae visena la nene navisokanena ana po, ana peraga, nepisu sane monar ve lelaga ga. <sup>19</sup> Ana pe nekilia re poli vanon ya ne sinemiun

asape akila sanene? Pona yar tai sinenan sape yuve tai, tai sape yuve tai sanene yo? Pona sinoñan osape otauuia vena yoko yar la avisave ko ke narui ope lelaga, pona ko ke narui naña Ntewa sike amio ko?

<sup>20</sup> Ana e lepas na pãpãgena wa, nemloge sane naga mēna nene asumã akila ke piowa ga. Pogos naña apim lele taaga vena kilaen pãpãgena wa nene, pe akila re si sane nasitomwalena kieta Supe poli, ana akila ke ga sa naña kamiu kina-nena taņena lala. <sup>21</sup> Visae tai imi loge viso karia, yoko naga suñalu kian limana la kilaparavi ve keviu, pona taņena mun kuruta na munena ve keviu, ana ve torokin re si laņasia! <sup>22</sup> Pona pe kamiu lelen viranen re kapi e poli yo, pisi na aim vena akinana loyuma e sumare? Pona asuma akila sanene komin naña asuma asitom korenan ke ga sumare kiena ne Ntewa, pona asuma asitom korenan ke ga erau na lelagaena taņena lala? Neminue kare narui ama nevisa ya ne van amiu e sur nene, yoko nevisa ga nevisave pe nekekan re nena poli.

<sup>23</sup> Mrapa mesmesu na kilaen kinanena wa, Supe ga pisa pan inu, ana siraunia in ke narui naña nemla lein pan amiu. Pa sanini, sa naña Supe Yesu, kiena yemalo maro nene, naña Sutas pielua naga ea, naga mla kilaparavi nene, <sup>24</sup> ana mlen pisa potenania, kawerovia, ana pisape “Tasneu ke nini narui, naña netamania vanon amiu. Ana monar asuma ala luen ga kilaparavi sanini silaga, sa naña sur na sitomalinena tai.”

<sup>25</sup> Ana siraunia, pogos naña akan pae, mla

piala na kuruta, kila ke m̃ena sanene, pisa pan la, pisape “Piala nini, naga kau kuruta, naṗa vena kilaen naviranarena viu naṗa Ntewa kila amio yaru suṃalu. A pogos punu ga naṗa ala piala nene, awis, monar asitoṃal inu.”

<sup>26</sup> Erau lala, nane visena kiena Suṗe e lepas nene, ana kila sane pogos naṗa tela kilaparavi a tela piala sanene, tesuṃa tepisawal ke nasitoṃalena na kiena marena, a monar tekila ṃa sanene vano tol pogos naṗa naga imi ṃalivin ita sina.

<sup>27</sup> A nalaen kilaparavi kana Suṗe nene amio ṃana piala, naga pe sur tai naṗa pe wa paṗisi. Visae yar tai la e ṗelaga tai naṗa ve mesmesu re, yaru nene kila piowa ga, ṗarnena kare tasnena Suṗe amio kana kuruta, sa ga naṗa naga ga ṃemom̃aria. <sup>28</sup> Ana pogos nakilaen ṗaṗagena wa sanene, monar ita make ga veve taaga tevisu ruru kieta malena lala, ṗisi na, tela kilaparavi amio kuruta nene. <sup>29</sup> A pogos naṗa telavia, monar tevisu kilale sane sur nene kana pupia kinasa suṃa ga, naṗa pisayu kieta Suṗe naṗa naga taṃan kiena malena vanon ita. Ana visae yar tai lavia, ve sitom re urmi sane ita make ga tepe tas taaga e Kristo, naga la korenan ga, ana yoko naga visu sa naṗa viowa manene laa vania. <sup>30</sup> Sur nene suṃa kila amiu ke rui, naṗa amiu mokliu yepemiu la miaiai a amai, pano-o tol naṗa kam laṗasa amare. <sup>31</sup> Ana visae tevisu ruru kieta malena silaga, yoko Ntewa ve la re nakoena sanene van ita. <sup>32</sup> Ana ita naṗa Ntewa kila sanene pan ita, ve tela re sa naṗa nakoena tai, tela sa naṗa navianena tai naṗa Ntewa kila

pan ita sape tekirava, vena la pulmas tai van ita e legiena maro, naþa yoko ve akoven ita re teva temio yar na yomarava taþena la naþa yoko ava e lele naloge viowaena.

<sup>33</sup> Erau wo lala, kiau visena ne na nene e lepas na kilaen þaþagena wa. Pogos naþa aimi lele taaga sanene, ana akila ga e þelaga napo. Ve yar tai kilali re naþa la þesania vena kan ve keviu, ana ava ruru amiu ga, pogos naþa amiu make ga asike lele taaga narui, ana akilia akila ga na wa. <sup>34</sup> Yaru naþa viso karia sitom manene laa kinanena, popon naga sumã ga uña, kinana ruru kana. A monar ataveve ruru kiau visena e lepas nene, visae peraga, pogos naþa aimi lele taaga, ana yoko taþatete suri tai wo van amiu.

Sur taþena si laþasa sike e inu vena visawalen van amiu, ana yoko nevisayu la van amiu e pogos naþa neim nomãalivin amiu.

## 12

### *Mãreraena la naþa Ninuna Wa kian ke sa naþa nalaena tai*

<sup>1</sup> Wolai a vineu lala, pogaga, sineun visayuen mãreraena la naþa Ninuna Wa kilia kian van ita li nalelagaena lala sane nalaena tai. E lepas nene, ve ave wowen re, ana sineun nesape monar akilia ruru toweli m̃aga. <sup>2</sup> Ana popon asitom si wasuþe va e pogos naþa kam na pe amlelaga re poli wa. E poglis nene, namãreraena na ninuna taþena lala asumã amiyumãe ke e amiu, aþure kare kiamiu sitomena la pa pe wowen ruru nenaga nalotunen nono kar la naþa pe apis

re poli. <sup>3</sup> Nane ninuna sur ne la naþa akilia akila yaru vis viowa va Yesu, viuelin kiena kia, ana Ninuna Wa kiena ne Ntewa naga taþatete la visena la ne sanene. A ninuna la nene, taþatete akilia akila yaru visa visena wo lala, naþa sape Yesu naga pe Suþe kemua lelaga, ana yar naþa visa sanene, tekilia tesape Ninuna Wa miyumuãae ke e kiena malena, mla visena na sanene pania.

<sup>4</sup> Sanene, pogos naþa tepisu m̃areraena wo la naþa li nalelagaena la akilia amiyumuãae amio, tekilia tevisave nane sane nalaena la naþa Ninuna Wa mla ke pan la. Mareraena mokliu nakilaen yumuãena la sike ne, ana Ninuna ne Ntewa naga taaga pe purþesan make ga. <sup>5</sup> Sa ga naþa þelaga na yumuãena la mokliu sike ga wa, ana kieta Suþe naga taaga pe þarun la make ga, <sup>6</sup> a sitomena wo na kilaen yumuãena la sike ne, ana Ntewa ga naga taaga kila la apa ke metava pan ita make ga. <sup>7</sup> Sanene, e lepas nam̃areraena lala naþa Ninuna Wa kiania, li nalelagaena lala aþar peve taaga sane tai mla tai, tai mla tai, taveve ga ya naþa Ntewa pisu sape yoko iila manene þegas nen li nalelagaena lala.

<sup>8</sup> Pan tai, Ninuna kian visena la naþa amanmarua paþisi.

Pan tai, kian navisukiliaena nowo lala.

<sup>9</sup> Pan tai, kian pupia naviawaena, pan tai, kian naþa kilia kila ruru maiena.

<sup>10</sup> Pan tai, kian naþa kilia yumuãen kile lala.

Pan tai, kian navisawalena suri la naþa pimi ke ga wa.



Pan tai, kian naþa kilia mēne plan yermare lala.

Pan tai, kian naþa kilia vis e visena taþena lala.

Pan tai, kian naþa kilia vilon visena kiena la naþa apis ke e visena taþena lala.

<sup>11</sup> Nane nalaena la naþa Ninuna Wa naga taaga kilia ligan se malena kiena yaru, kian plan ke pan ita peve taaga taveve ga ya naþa naga sinenania.

<sup>12</sup> Li nalelagaena lala aþar nalaena taþena la ne sanene, sa naþa tasneta lala kiela kinakinas taþena lala mokliu. Kinakinas taþena la nene, amiyakolkol la asuṃa amiyuṃae ruru ke veraga e tas taaga, a sa mēna ga nene loyuṃa e þegas kiena ne li na lelagaena lala, naþa la na sane kinakinas nen tasnena Kristo. <sup>13</sup> Pona ita tepe yere Yu pona tepe yere Krik, pona tepe yerkaawa pona tesuṃa temiyuṃae korena kiena yerkaawa tai, ana Ninuna ne Ntewa naga þere ita make ga, kila akee ita vena teimi teve kinakinas nen tasnena ne Yesu komþasa, ana Ninuna ne nane naga taaga sike e kieta malena peve taaga.

<sup>14</sup> Popon tesitom manene laa totou naþa tesuṃa tepisa ke ne, sane ita li na lelagaena lala ita na sane tasnena Kristo. Ana e lepas na tasneta lala, tekilia tesape kana kinakinas la mokliu.

<sup>15</sup> Ana sanene, pe mesmesun re naþa kinakinas komþasa sane lana, mloge piowa, suṃalu pisape “Ke, in na nepe lana ga, in na pe nemiyuṃae ruru re sane limana miyuṃae poli, pona in na pe pon re ga neve kinakinas nen tas komþas poli.” Ana peraga, lata pisa þele sanene, komin

naga pe pupia kinakinas na tasneta komþas rui. <sup>16</sup> Ana pe mesmesun re naþa kiligata loge viowa poli, suñalu pisape “Ke, in na nepe kiligana ga, pe nepisu kilale re sur sa naþa kilamarana kila ke poli, pona in na pe netorokin re nesikol nemio tasnena poli yo.” Ana peraga, kiligata taþatete visa sanene, komin naþa naga kiena yumãena napo e tasneta sike pa rui. <sup>17</sup> Naga nene komin naþa visae tasneta ve kilamarana ga, yoko taþatete teloge kilia suria, a visae tasneta ve kili-gana ga, taþatete telopon suria. <sup>18</sup> Ana e tasneta, Ntewa kila taveve kiena sitomena, mligan ruru kinakinas make ga su mesmesu ruruia sike nena e lelela lala, vena la veve taaga akila nena kiela yumãena lala. <sup>19</sup> Visae kinakinas nen tasneta make ga maran ve taaga, yoko taþatete tevisu sane tas tai, <sup>20</sup> ana kinakinas taþena la monar asikol la lele taaga vena kila sane tas nen yaru. <sup>21</sup> Kilamarata taþatete visa kare limata, visave “Ke, pe sineun ko re poli,” a þarita taþatete mñene lata, visave “Ke, pe nesitom ko re si poli.” <sup>22</sup> Pe sa re nena nene poli, ne! Kinakinas nen tasneta la þasia amalumlum paþisi, ana tekilia sane asumã akila ke pupia yumãena. <sup>23</sup> Kinakinas nen tasneta taþena laþasa, pe tesitom re tesape aña la apo sanape wa, ana tesumã tepisuar ruru la. Kinakinas nen tasneta taþena lala, pe sinetan re yar taþena visu poli, ana tesitom urmin naþa teyenwoia. <sup>24</sup> A kinakinas nen tasneta taþena laþasa, la atorokin ga naþa yar la akilia avisuia, ana ve teyenwo re. Sanene tepisu ke naþa Ntewa mligan ruru make kinakinasnena mesmes ga,

a mligan sitomena tai sike e ita sape pe sur korena naþa kinakinas laþasa amalumlum, po pe akila re yumãena keviu poli, ana tesitom urmi e la a tepisuar ruru la. <sup>25</sup> A naga nene kila naþa kinakinas make ga pe apeveyun la re poli, asu ruru ga, asumã amiila la ke sina ga silaga. <sup>26</sup> Visae kinakinas nen tasneta tai loge viowagan sur tai, kinakinas taþena make ga monar aloge viowa amio, a visae avisirlua kinakinas taþena tai akila wo vania, kinakinas make ga akilia aloge wo amio.

<sup>27</sup> Ana visena la nene la kala kinasa sanini, sane ita li nalelagaena lala, ita na sane tasnena Kristo, a ita peve taaga tepe kana kinakinas lala. <sup>28</sup> A Ntewa mligan ita kinakinas na tasnena Kristo, ve nakilaen yumãena lala na sumãare. Na sumo, Ntewa pisirplan laþasia ape nalologena, a nalua, laþasa ape navisawalena, a natelu, laþasia ape navianena, a suraunia, la mñena ga þasia naþa ave nakilaen kile lala, pona akila ruru maiena lala, pona avisuar yumãena na sumãare, pona avis e visena taþena la, sanene. <sup>29</sup> Ana þegas nen li na lelagaena lala, tepisu naþa la make ga ape nalologena? Pona la punu ga ape navisawalena? Pona la make ga navianena? Pona la make ga ape nakilaen kile? Peraga, sa re nene poli. <sup>30</sup> Pona la make ga nakilaruruen maiena? Pona la make ga akilia avis e visen taþena lala, pona avilon visena taþena lala? <sup>31</sup> Pe sa re nena nene poli, ana popon vena la make ga akekaran naþa atol pupia namãreraena ya naþa Ninuna kilia kian van la.

A e m̃areraena la nene, tai suñã ga naña monar imi ãesa e kieta malena ita punu ga, naña po taulu make tañena lala, naña sineun visayuen van amiu, nane ãelaga na sinesiena.

## 13

### *Sinesiena*

<sup>1</sup> Sinesiena, naga sur tai naña monar ve sur nasumo e kieta malena. Pona nekilia nevisi kome visena kiena yar tañena la woga yo, pona nekilia nevisin visena kiena navisi la woga yo, nanene pogaga, ana visae ve sineu sii re yar lala, nekila ke sane kiau visena make ga sane ãe tai naña añea miyelu wowe korena ga. <sup>2</sup> Pona pupia m̃areraena sike e in yo vena visawalen visena kiena ne Ntewa, pona nekilia ruru sur moki naña yar tañena la pe akilia re poli yo, pona kiau naviawaena keyiu manenea torokin nelotu ana sur la imi m̃alm̃alivi yo, sur la nene po manene pañisi, ana visae ve sineu si re yaru lala, nepe sur korena ga. <sup>3</sup> Pona nekian kiau sur make ga pa yar la naña limala korena yo, pona nesuñalu m̃arera m̃a pano-o asikap tasneu komin naña nepe yaru kiena Kristo, naga m̃ena nene po na po, ana visae ve sineu sii re yaru, nekila korenan ga.

<sup>4</sup> Ana pupia sur nene, ãelaga na sinesiena, naga sanape? Kiena sitomena piavi, a naga sinewo. Naga pielue re poli, naga pilave re poli, a naga pisirlua re si naga poli. <sup>5</sup> Kiena ãelaga po, naga puluvis re poli, naga sinena mimi koskos re poli, a naga tarar re sitomena viowa piavi poli.

<sup>6</sup> Naga pe sinenan re sur viowa poli, ana naga kekaran ga sur wo. <sup>7</sup> Sinesiena naga suñalar lue ga, sinesiena naga lelaga lue ga, sinesiena naga wasine lue ga, a sinesiena naga taulu lue ga. <sup>8</sup> Sinesiena naga pe sinena mare re pogos tai poli.

Lelaga pañisi, namãreraena tañena lala, sane navisawalena lala, pona navisaen visena tañena lala, pona nakiliaena lala, yoko tañatete sike lue, ana nasinesiena ga naga su lue, naga tañatete ãisi pogos tai. <sup>9</sup> E kieta pogosia, asumã apisawal ke visena kiena ne Ntewa, a asumã apian ke nakiliaena la ne sanene, ana ya naña asumã akila ke nagane, naga komãas nena ga, pe wetelu re nenaga ãisa. <sup>10</sup> Sur la nene ape nanagane ga, a e pogos naña Ntewa yoko kila sur make ga imi wo ruruia, sur tañena la nene yoko añisi, ana sinesiena yoko su lue.

<sup>11</sup> Naga maran taaga ga amio kieta malena. Pogos naña tepe sisi ke ga wa, kieta visena amio kieta sitomena mla ke ga ãelaga kiena sisi. Ana pogos naña tepe yerka, pe tesa re si ninis poli, kieta ãelaga marua ruru nenaga. Ana kieta malena amio Ninuna Wa monar ve sa mñena ga nene. <sup>12</sup> A maran taaga mñena ga e kupito naña tepisu ke marata ea. Pogos tai, visae kupito nene namname pona pe urmarua, ana tañatete si tekilia tevisu ruru marata ea. Ana e pogos naña Ntewa kila ruru make sur la imi wo, yoko tevisu kilale make suria, a yoko tevisu nena marana Ntewa e kilamarata. A e mñena e lepas na kieta kiliaena, nagane tekilia vitokak ga, ana e pogos

naþa pimi ke ne, yoko Ntewa kila naþa tekilia ruru naga, amio sur taþena make ga, maran ve taaga sa ke ga naþa naga kilia ruru ita nanua sumo rui pimi tol nagane.

<sup>13</sup> Sanene, sur taþena lala yoko þisi, ana sur la ve telu ga yoko kilia sulue, nane naviawaena, nawasineena, a sinesiena. A e sur la telu nene, naga naþa keviu manenea, nane nepisa maron ne, naga sinesiena.

## 14

*Pol pisayu sina m̃areraena lala kiena Ninuna Wa, sa naþa avis kome visena taþena lala*

<sup>1</sup> Ana komin sinesiena naga pe sur tai naþa keviu manene sanene, monar aligan naga su þesia e kiamiu malena. A amio naga nene, monar aligan kiamiu sitomena se nam̃areraena la naþa Ninuna Wa sum̃a kiania, akekaran naþa atolia. A e m̃areraena la nene, tai naþa po manenea, na naþa yar visawal visena kiena ne Ntewa.

<sup>2</sup> Visae yar tai sum̃alu visawal visena kome visena taþena naþa Ninuna Wa mla pania, pona wo van yo, ana sa naþa pis ke ga pa Ntewa, naga pe sum̃a pisa re visena naþa yar taþena la akilia aloge kilale poli. Pona naga sum̃a pisawal ke pupia visena la naþa Ninuna Wa mla ke pan yo, ana visena la nene pe merarava re pan ita poli, tapolou ga, taþatete tetolia. <sup>3</sup> Ana visae yar tai visawal visena lala kiena ne Ntewa van ita, vis van ita kome kieta visena, kiena visena wo la nene akilia akila ita tom̃arera, akilia avisir plan kieta sitomena, akilia akila luþeluþe losineta.

<sup>4</sup> Sanene, yar naña pis ke kome visena tañena naña Ninuna Wa mla pania, sumña pagan ke sina ga naga taaga, ana yar naña pisawal ke visena kiena ne Ntewa naña yar la amloge kilalea, naga sumña pagan ke sumñare make ga.

<sup>5</sup> Pogaga, nekekarana naña visae avis kome visena tañena la ne sanene, ana nepisu sane popon manene visae asuñña avisawal ke visena kiena ne Ntewa van yar tañena lala. Naga naña suñña pisawal ke visena kiena ne Ntewa, kiena yuññaena po manenea taulu yuññaena kiena yar naña sumña pis ke kome visena tañena. Naga nene komin yar naña sumña pis ke kome visena tañena, kiena yuññaena tañatete kilia war mrasa e malena kiena yar tañena. Kiena yuññaena tañatete vagan sumñare visae yar re tai naña sumña vilon kiena visena vena yar tañena lala akilia alogekilalea.

<sup>6</sup> Erau lala, asitomyulia visae inu, pogos naña nepim ke pun amiu nesuñña nemlologo kome visena tañena naña Ninuna Wa mla pan inu. Ana yoko tañatete nena kiau visena la ne sanene kilia iila amiu. Ana pogos naña nepis kome visena naña akilia amloge kilalea, kila sane ya naña nemla pan amiu, sane sur viu tai naña Ntewa kipian inunia, pona kiliaena tai, pona navisawalena tai na visena kiena ne Ntewa, pona vianena tai, ana kilia iila ruru kiamiu malena.

<sup>7</sup> Naga sane plañe amio kana laki naweena naña aña apolu, visae sur lua nene amenunu, ana pogos na wolena tañatete ologe yauena pona pialu yelu. <sup>8</sup> Ana visae suñe tai sinenan visave

we ãe na kumali, ana ãe nene menunú, taãatete yelu ruru ve keviu, yoko yeririna la taãatete akilia aloge kilale avisave suãe ãe ãe na ya. <sup>9</sup> Ana sa ke ãena nene e kiamiu suãare gar e naãa. Visae yar tai suãa pisa ke visena lala kome visena taãena naãa yeririna la akilia re poli, yoko taãatete nena atol narin sur tai e ya naãa naga sinenan sape visa van la. Kiena visena yoko va kovio ga e yepesinas na ãeke ne.

<sup>10</sup> Sa naãa tekilia, visena mokliu sike e yomarava, a kiela visena lala kala kinas la suãa ga. <sup>11</sup> Ana visae neva ko yo tai, neninue kiena visena, in na sane nepe wolawa ga e yo nena, a la ãena ga ave wolawa ga e inu. <sup>12</sup> Ana visena nene, kana kinasa e amiu naãa asuãa aãion ke asape ãareraena lala kiena Ninuna Wa ayuãae likan amiu. A kana kinasa sanini, ve akila re naãa kam veve taaga asuãa avisir plan amiu ga, ana monar awionlia vena amiu make ga asuãa avisirlua suãare imi ãarera ruruia. <sup>13</sup> Ana visae amiu yar tai kilia visi kome visena taãena tai sanene naãa Ninuna Wa mla pania, popon naga lenin va Ntewa vena Ntewa la ãareraena vania vena vilon kiena visena la nene ava e kiamiu visena. <sup>14</sup> Nepisa sanene komin naãa visae nelotu kome visena taãena na sanene, nepisu sane nesuãa nelotu ke ga e ninuu, ana loyuãa e kiau sitomena nemninue ya naãa nesuãa nepisa ke ne. <sup>15</sup> Visae ve sanene, yoko popon tekila ve sanape? E kiau navisuena, popon tekila e lepas ga luwoka veraga. Visae nesuãa nelotu, pona nesuãa neyau, ana popon nekila e visena naãa molue kome ninuu, a popon ãena nekila e



visena naþa molue kome kiau sitomena. <sup>16</sup> Visae peraga, pona osumã olotu ga kome visena naþa molue kome ninuã, osumã ovisa potena va Ntewa komin sur laþasa, ana yar taþena naþa loge þele visena nene, yoko taþatete kilia, yoko taþatete visa “Sanene” e kioã leniena. <sup>17</sup> Pona osumã om lotu ke sanene, opisa ke suri wo la moki yo, ana kioã lotena nene taþatete kilia iila sitomena kiena kioã erau þisa.

<sup>18</sup> In na nekekara paþisi naþa Ntewa mla namãreraena nene pan inu vena nevisi kome visena taþena naþa Ninuna Wa mlavia, nepisa potena pan paþisi, a nepisu sane inu na nekila keviu paþisi taulu amiu make ga. <sup>19</sup> Ana nesuã nekila ke e pogos naþa inu ga taaga nesiau, pe nekila re e maran yaru la poli e pogos na sumãre. E kiau navisuena, visae nevisa visena tai ve tokak ga kome visena tai naþa yar la akilia, naþa kilia vian kiela malena, naga nene po manene laa taulu naþa visae nekila visena la ve moki kome visena taþena tai naþa la pe amloge kilia re poli.

<sup>20</sup> Erau lala, awis akilali naþa asitom ruru e sur la nene, kiamiu sitomena ve ve sa re ga ninis. Pe lelaga naþa e lepas na þelaga viowa lala, popon ave sa ga ninis, ve akilia make re sur ea. Ana e lepas na þelaga wo, kiamiu sitomena lala monar marua ruruia. <sup>21</sup> Visena tai sike e Siriena Marua, pisawal visena tai naþa Ntewa pisa sanini, sape

*Yoko noure yar la naþa apimi e purvanua taþena lala, naþa apisi kome visena taþena lala, neligan plan la avano vena avisawal kiau visena van kiau yeririna lala.*

*Ana kiau yeririna lala ape þarmãrera paþisi,  
yoko taþatete ayagogon kiau visena la naþa  
wolawa la nene avisawal van la. Ais  
28:11-12*

<sup>22</sup> E visena nene, nepisu naþa Ntewa pi-sawalia pisape namãreraena na visinen visena taþena lala naþa Ninuna Wa kiania, naga na ya? Mareraena nene pe pe kieta re poli ita la naþa temlelaga pa þisi rui, ana naiilaen la naþa pe amlelaga re poli wa. Pogos naþa aloge, avisu kilalea sane lelaga. Ana namãreraena navisawalen visen kiena ne Ntewa, naga kilia iila manene ita naþa temlelaga rui, naþa tekilia teloge ruru merarava wo. Ana namãreraena nene taþatete iila manene la naþa pe amlelaga re poli, komin yepela mavin yagogonen visena lala kiena ne Ntewa.

<sup>23</sup> Ana pogos naþa aimi lele taaga vena kilaen sumãre sanene, pe pon re asuñã avis manene kome visena la naþa Ninuna Wa mla ke pan amiu poli. Visae pogos tai, yar tai naþa pe kilia ruru re sur nene poli yo, pona pe mlelaga re poli, visae naga imi loyumã e kiamiu sumãre, yoko naga visa ve sanape? Yoko naga monar sitom visave kam make ga ape wowe la. <sup>24</sup> Ana visae imi loyumã, visu naþa asuñã apisawal ke visena kiena ne Ntewa kome visena naþa amiu punu ga akilia, yoko naga yagogon ruru kiamiu visena wo lala, ana kilia yur kiena malena, kilia kila naga visu kilale kiena mlamulena viowa. <sup>25</sup> A pogos naþa yagogon mña sanene vano-o, yoko naga loge visena kiena ne Ntewa tol kiena malena, va yupor e sur la naþa naga þarwan sike e kiena

sitomena, a yoko kila naga sinena ye si naga, kinai tano lotun Ntewa, visawal visave lelaga, Ntewa sike likan amiu.

*Monar teyuñae e nam̄areraena kiena Ninuna Wa e ãelaga mesmesu*

<sup>26</sup> Taveve visena la nene e lepas na nam̄areraena lala naãa Ninuna Wa kiania, yoko akila ve sanape e pogos na kiamiu lotena lala? Pogos naãa aimi lele taaga, popon vena aliureure kana yuñae lala van amiu. Sanene, yar tai la yauena tai, yar tai la navianena tai, yar tai la sitomen viu tai naãa Ntewa pisawal pania, yaru tai la visena tai e visena taãena tai naãa Ninuna Wa kian pania, a taãena kilia vilon visena nene vena yeririna la make ga akilia kana kinasia, ana suri punu ga kilia vagan ruru malena kiena li nalelagaena la naãa asike ne.

<sup>27</sup> Ana sa naãa nepisa, visae e pogos nene, yar tai sinenan vis kome visena taãena naãa Ninuna Wa kian pania, nanene pogaga. Visae ve lua pona ve telu naga pogaga m̄ena ga, ana monar ve yuve re telu. A ve avis re veraga, ana ala pogos van la, tai sumo, siraunia taãena sanene. A tai m̄ena ga, visae tai vis pae, yar taãena monar vilon kiena visena, vena la make ga akilia. <sup>28</sup> A visae sinelan visen kome visena taãena sanene, ana visae pe tai re suñae ga naãa tol nam̄areraena na visawalen kinas nen visena la nene poli, yoko la ve avivis re si kome visena taãena la ne sanene e maran yaru lala. Yaru na sanene, yoko topur ga, a kilia vivis ga kome

visena taþena e ga e ninuna, naþa naga ga amio Ntewa lalua akilia aloge.

<sup>29</sup> E lepas kien la naþa apisawal ke visena kiena Ntewa, popon sane la ve lua pona ve telu ga avis. A pogos naþa avis pae, popon li nalelagaena taþena lala avisawal kiela sitomena ea. <sup>30</sup> Visae tai suña mlologo mñaga, ana Ntewa kila sitomena viu tai imi van nalelagaena taþena naþa totano teke ne, naga naþa suña pis ke ne monar þisi kone wa vena la pulmas van taþena nene. <sup>31</sup> Sanene, amiu punu ga akilia atol pulmas na visawalen visena kiena ne Ntewa, naþa tai visawal tai, þisi taþena visawal tai, sanene. Ana visena la nene yoko kilia visirlua sitomena kien yaru make ga, a la make ga akilia atol sur wo ea.

<sup>32</sup> Visena wo tai sike ne, naþa torokin la naþa aþar ke nañareraena naþa Ninuna Wa kian pan la. Visena nena pisa sanini, sape Ninuna naþa mla visena pan yaru naga pe mñareran re yaru poli, ana naga monar logear ga manmaruaena kiena yaru nene naþa pisawal ke visena nene. <sup>33</sup> Visena nene kana kinasa asape monar teyuñae e þelaga wo sa naþa Ntewa naga sinenania, komin naga pe suña miyuñae kar re poli amio kiena nañareraena, ana suña miyuñaen ke sur punu ga torokin þelaga na suñarena.

A popon akila ve sa naþa þegas nen li nalelagaena wa taþena lala asuña akila, <sup>34</sup> naþa pogos na lotena, akila naþa sira lala apa ruru la ga asuña ga. Pe atamñan re sira la asuñalu poli vena avis e marana yermene lala, komin sa

naña navisaluaena marua pisa, sira lala monar ve asu re metava taulu yermene lala. <sup>35</sup> Visae sira la sinelan kiliaen suria, pe pon re aviun manene naviunena poli pona avisawal manene kiela sitomena loyuma e sumare, ana visae ava uma narui, akilia aviun ga va wola la na wa.

<sup>36</sup> Nanene kiau visena lañasa naña pan amiu, ana pe pon re kam lañasa asitom asape nepisa sur nene pe memes re poli. Pe kami re naña Visena Wa kiena ne Ntewa pimi pes pan amiu poli, a pe kam re ga naña atol poli. <sup>37</sup> Visae kam yar tai sitom visave naga yar na visawalen visena kiena ne Ntewa, pona naga pe yar naña sitom ke sape naga taveve ke mrapa naña Ninuna Wa kila pe merarava pania, naga ke narui naga po, ana visae ve sa kemua nene, yoko naga monar visu kilia visave sur la naña nesuma nesiriyu ke pan amiu, ape visena kiena Supe kemua lelaga. <sup>38</sup> Ana visae naga ve visu kilale re sane kiau siriena la nene ape visena lelaga kiena Supe, yoko monar ve ataman re si naga yuma amio amiu.

<sup>39</sup> Pogaga, monar asitom ruru kiau visena lala, nesape amareran naña vena atol namareraena na visawalen visena kiena Supe, ana visae la pasa atol namareraena na visena kome visena tapena naña Ninuna Wa kian pan la, monar ve avisalupar la re avisave kilaen toko. <sup>40</sup> Ana visae akila nene, pona ya sina, ana monar akila sur make ga taveve kana mrapa naña memes ruru po.

# 15

## *Sumālen sina e marena*

<sup>1</sup> Erau lala, sineun nesape nevisayu si Lologena Wo naña nepim nemlologon pan amiu rui, naña amlavia, asumā asumā ke mārera ea, vena kila amiu ve sinemiu p̄esan re. <sup>2</sup> Lologena Wo nene na naña visae asumā amlarar ke mārera yo wa, naga sumā kila ke naña atol kiamiu natamaliaena. Ana visae ve atarar re si mārera torokin ya naña nemlologon pan amiu, pona visae avilon ve ve taḡena, kana kinasa sane amlelaga nanua sumo ana amlelaga korenan ga.

<sup>3</sup> Lologena Wo naña amla p̄esan pan inu nanua sumo, nane nemla narui, nepisawal ke pan amiu ne. Kana pupia visena ne lala apisayu Kristo, naña naga kila maran taaga sa ke naña Nasiriena Wa pisayu nakonua rui sape yoko naga kila, pogos naña naga pe pitomi re poli wa. Pa sanini, sape Kristo, naga mare wo ita vanon kieta mlamulena viowa lala, <sup>4</sup> siraunia amligan naga m̄ene puluve, siraunia e kana legiena na telu sumālu mal sina, <sup>5</sup> a siraun naga nene naga m̄alivi p̄esan e marana Keḡas, siraunia, naga m̄alivi ke sina ga e marana la lualima yam taaga pa lua. <sup>6</sup> A siraun naga nene, pogos si tai naga m̄alivi e marana p̄egas nen li na lelagaena lala, la taulu ponotia lima [500], naña la mok liu amal ke ga wa tol nagane, ana laḡasa akokovio rui. <sup>7</sup> Ana siraunia, naga m̄alivi sina ga e marana Semes, siraunia m̄alivi e marana nalologena taḡena lala,

---

**15:4** Mat 12:40; Yumāena 2:24-32      **15:5** Luk 24:34, Mat 28:16,17; Mak 16:14; Luk 24:36; Yoan 20:19

<sup>8</sup> ana siraun nene, naga p̄asuṗe si pa ma e peni. In na pe nesu re e poglis nene poli, ana potena paṗisi naṗa siraunia, Suṗe m̄alivi si yam tai, naṗa naga m̄alivi maro nenaga, m̄alivin inu.

<sup>9</sup> In na pe netorokin re naṗa naga kila sanene van inu poli, komin naṗa e nalologena make ga, in na nesumaro tano, a in na pe netorokin re nena kia nene poli, komin nanua ne in ke narui naṗa nesuṃa nom̄ene ke p̄egas nen li na lelagaena lala kiena ne Ntewa. <sup>10</sup> Ana Ntewa

naga pe lemam pan inu paṗisi, pisirlua inu e yo naṗa nesike e nagane, a naga pe lemam korena re sanene pan inu poli, komin naṗa nekila ke kiena yuṃaena kerkeviu la moki. Lelaga, pona nekilia nevisave in na nekila ke yuṃaena pa laa sane taulu make taṗena lala, ana pe in re naṗa nekila ke poli, ana lemamiena kiena ne Ntewa ne nanene narui naṗa sike e inu, naga ke narui miyuṃae p̄arpoyo kome kiau malena.

<sup>11</sup> Ana in na pe nesitom manene re nesape in na nemiyuṃae ke sanape, pona nalologena taṗena lala amiyuṃae ke sanape, ana pupia sur nena sane memlologon Lologena Wo pan amiu, ana amlelaga ea.

<sup>12</sup> A pogos naṗa memlologo ke sanene pan amiu, mepisawal meraravan ruru pan amiu mesape Kristo, naga mare, ana siraunia mal sina. Ana komin naṗa mekila ke sanene, nemilan paṗisi naṗa nemloge sane kam la p̄asa asuṃa apisape pogos naṗa tokovio, asin ita, ana yoko temare lue, ve temal re si pogos tai. <sup>13</sup> Sitomena

na sanene pe mesmes re poli, komin naña visae asuñña avisave pe yaru re tai naña kilia suññalu si poli, kana kinasa sane Kristo mña pe suññalu re si poli. Ana peraga, Ntewa pisirlua naga mali si rui. <sup>14</sup> Visae naga ve visirlua re Kristo, kila sane memlologon korenan ka ga Kristo pan amiu, a amiu mña amlelaga korenan ga. <sup>15</sup> A visae ve sanene, kila sane pogos naña memlologon ke sanene pan amiu mesape Ntewa pisirlua Kristo mal si rui, mepisokan pañisi e kia kiena ne Ntewa, pona mepian amiu ke e sur tai naña pe lelaga re poli. <sup>16</sup> Visae lelaga naña sane yar mare tañatete si mali, kana kinasa sane Kristo mña ga tañatete si mali. <sup>17</sup> A visae Kristo mare mon mña sanene, kana kinasia sane kiamiu naviawaena pe sur korena ga, a kana kinasia sane kiamiu mlamulena viowa la sike e amiu na wa. <sup>18</sup> A visae Kristo ve mal re mña ga si sanene petan marena, kana kinasa sane kieta erau la naña amlelaga ana akovio rui, apa e yo viowa rui, komin pe yar re tai naña kilia tamalia la poli. <sup>19</sup> A visae kieta lelagaena e Kristo suñña miila ita e ga e yomarava nini, ana tañatete iila ita e pogos naña tokovio ea. A visae Kristo tañatete tamalia ita e pogos naña tokovio e yomarava nini, yoko viowa manene van ita, sineta ye kare ita vañisi.

<sup>20</sup> Ana peraga, pe sa re nena nene poli, nekilia nevisa mesmesu nevisa ve lelaga, Ntewa kila si Kristo mal si petan marena, a pisirlua naga sane pe mras ñesa kiena li na lelagaena make ga, naña visae akovio pogos tai, ana yoko Ntewa kilia kila amal sina ga vetan marena. <sup>21</sup> Nanua e purñesa, yar ñesa naña Atam ñere marena



pimi e yomarava, ana nagane, yar tañena nene naña Kristo ðerelua malena petan marena pimi. <sup>22</sup> Taveve ya naña Atam kila, yeririna make ga na yomarava monar amare, ana taveve ya ne Kristo kila, yeririna make ga na yomarava akilia alual malena. <sup>23</sup> Ana sur make ga kala pog mesmesu sike ne, komin naña Kristo naga sumon naña suñalu ðesa e marena, ana ita li na lelagaena lala yoko tesuñate mña vano-o tol pogos naña naga wasuñe sina, ana yoko ita mña tesuñalu e marena. <sup>24-25</sup> Ana siraun nene yoko naga wereplan ninuna viowa lala amio yermare lala na yomerava, a yoko naga taaga ve ðarin suñen sur make ga, vano-o taulu namareraena viowa tañena lala asike vatanon lana. Pisi yoko naga war nasuñenen wetelu e sur make ga wasuñe si va Ntewa Arimana. <sup>26</sup> A e nasinekar la naña yoko Kristo taulu e pogos nene, naña yoko naga taulu maronia, sur nene marena, amio kiena namareraena viowa lala. <sup>27</sup> Kristo monar taulu marena nene, komin visena na metava ne pisa sanene rui, sape yoko Ntewa ligan sur make ga su vatanonia. Ana visena nene kana kinas pe pisa re sape Ntewa mligan ke sina ga naga sike vatanon Kristo poli, ana pisayu sur tañena lala, naña yoko Kristo taulu make la nenaga. <sup>28</sup> A pogos naña Ntewa mligan sur make ga sike vatanon Kristo sanene rui, yoko Kristo, sane narina Ntewa, mligan sina ga naga vatanon Ntewa, ana yoko kila naña Ntewa naga taaga ve Ntewa na sur make ga.

<sup>29</sup> Nowasuñe si neva e visena naña nepisayu nesape visae temare, yoko siraunia tesuñal sina.

Ana laþas naþa amlelaga sa nene, la asitom manene kiela erau la naþa pe akeela li re poli wa, ana amarmare. Asitom ke asape la nene taþatete atol malena, kila narui akee la sina e kia kiena ne kiela erau lala naþa amare rui. La akila ke sanene, komin naþa amlelaga m̃arera asape visae temare, yoko tesuñal sina.

<sup>30</sup> A imimi m̃ena ga maran taaga, asitomli sane komin ya ne mesuñã moñal pog m̃arera lala e pogos make ga? Mesuñã moþar ke naloge viowaena la sanene komin ga memlelaga m̃arera mesape visae yaru tai mare, yoko naga kilia mal sina ga vetan marena. <sup>31</sup> Lelaga erau lala, mesuñã memiyuñae ke sanene, nekilia nevisa mesmesun sane nemloge sane nesuñã netañan ke kiau malena vanon amiu e legiena make ga. Ana nanene pogaga, komin nekekara na nekekara e malena naþa atolia amio kieta Suþe Yesu Kristo. <sup>32</sup> A pogos naþa nesike e pulkumali naþa Episas, þarm̃arera lala nae yo nene la asaga lokul tetan lala, asuñalun inu lue ga, ana komin ya ne nesuñã nepisalupþar la? Nesuñã nekila ke sanene, pe netaulu re nena sur wo tai na malena na yomarava nini, ana nesuñã nekila ke sanene komin nesitoñal ke malena na pimi ke sirau.

Visae ve malena re nene, popon teve sa ga yar kar taþena la naþa pe amlelaga re poli, naþa la asuñã apivis ke sanini, asape, “Pane, tekila þaþagena, ve tesitom re sur tai, komin naþa peni, ane kilia? Visae temare na þisi narui, yoko taþatete tekilia sur tai.”

<sup>33</sup> Ana monar ve ataveve re sitomena na

wowe la ne sanene, visae peraga, yoko visena taņena nene imi ve lelaga e amiu, naņa pisa sanini, sape “Oyaloro omio erau viowa lala, yoko kiela napiowaena kila kare kioņa pļelaga wo.”<sup>34</sup> Monar aim ave manmarua, a monar aligan kiamiu mlamulena viowa lala. Nepisa sanene, pona asitom ke asape nekila kare kiamiu kia yo, ana monar nevisa, komin kam laņasa pe akilia ruru re nena mrapa mesmesu lala kiena ne Ntewa poli.

<sup>35</sup> Ana e lepas na malena si e marena, yoko laņasa aviun sanini, avisave “Yoko akila si yar mare la amal e marena ve sanape?” Pona yoko aviun sanini, avisave “La naņa amare nakonua rui, yoko asumal sina amio tasnela na sanape?”<sup>36</sup> Ana naviunena la ne sanene ape naviunena kiena yar naņa pe kilia re sur poli. Visae tesitomli narin kurus nen sur la naņa tesuņa temapila ke ne, yoko telual kana navisataņeena. Pogos naņa omapila narin kurus tai vito e porotano, okilia rui osape kurus nene monar menun, monar mare, ana siraunia, yoko sirus viu kilia kapur komea.<sup>37</sup> Sur naņa omapila, naga kurus ga tai naņa yoko sike e porotano, ana sur naņa yoko kapur marea ve urviu sina, naga ve sur taņena.<sup>38</sup> Sa naņa omapila ke kurus la peve taņena ana Ntewa suņa kila sirus viu lala peve taņena,<sup>39</sup> a maran ve taaga e sur mali lala, naņa tasnela la peve taņena. Tasnena yaru kana tata pe taņena, a surmali lala sane na porotano, na si, po na metava, la peve taaga tata taņena la sike e la.<sup>40</sup> A surmali la nene, tasnela lala pe

taņenan manene laa e tas nen sur taņena la naņa asike ma e sinapane, <sup>41</sup> sane mrae, kupario, amio verue lala. La telu nene, tai marana pe taņenan maran taņena, a maran taaga mņena ga e lepas na verue lala, naņa tai, marana pe taņenan taņena.

<sup>42</sup> Ana sur make ga la nene, tepisu naņa Ntewa kila la ape taņena manene laa, a sur nene þar totou na tasneta, kiena ita la naņa tokovio, naņa tekilia tokusia pogos naņa tesuņalu temal sina. Tasneta vito e pulus nen porotano, sane kurus tai naņa amapla, naņa monar menun, ana siraunia, tasneta viu naņa molue yoko taņatete si imi viowa pogos tai. <sup>43</sup> Tasneta naņa vito e porotano, tepisu piowa ga, a pororovia, ana tasneta viu naņa mņalivi sirau, yoko tevinaia vaņisi, a mņarera ruru wo. <sup>44</sup> Sur naņa vito e porotano, naga e lepas na tasneta ga ne, ana sur naņa mņalivi sirau, naga e lepas na ninuta. <sup>45</sup> A tekilia tesitoņal mņena yar na sumo naņa Ntewa siia, naņa Atam, amio Atam maro naņa mligan e yomarava, naņa Kristo. Visena tai pisape Atam, Ntewa kila naga pimi amio tasnena tai naņa mali, ana Kristo, Ntewa kila naga pimi amio ninuna tai naņa pe purþes nen malena. <sup>46</sup> Taveve nene, tepisu naņa sur na lepas nen tasia pimi þesa, ana sur na lepas na ninuna, pimi maro. <sup>47</sup> Yar na sumo naņa Atam, Ntewa sii naga molue kome porotano na yomerava nini, ana yar na lua naņa Kristo, Ntewa mligan naga kom ma e peni pitomi. <sup>48</sup> Ana ita yeririna taņena lala, ita naņa tepe na yomarava, tokus ke þelaga kiena yar na sumo na yomerava nini, ana ita naņa tepe nae ma e

peni, tokus ke ðelaga kiena naga naþa pitomi ma e peni. <sup>49</sup> A ita naþa temlelaga, sumo tokus maran yaru na yomerava, ana nagane tokus ke maran yaru nae ma e peni. <sup>50</sup> Erau lala, sur naþa kate ga e yomarava nini, sane tasneta, taþatete va loyuma e nasuþenena kiena ne Ntewa nae peni, a sur naþa yoko va kovio, taþatete va tol yo naþa sike sike lue.

<sup>51</sup> Ana yoko ve sanapen li na lelagaena lala naþa amal ke ga wa, pogos naþa Kristo wasuþea? Sur nene, pe yar mok re naþa akilia poli, ana yoko nevisawal mesmesun van amiu. Lelaga, ita li na lelagaena laþasa yoko ve temare re e yomarava nini, ana e pogos nene, yoko tasneta vilopu nena veraga sa ga yekarpla. <sup>52</sup> Sa naþa toþelawa ve plas ga, yoko teilan ga kumasua yelu, a yoko li na lelagaena la naþa amare pa rui yoko asuñal amal sina amio tasnela viu, a ita mēna naþa temal ke e pogos nene wa, tasneta mēna lala yoko imi ve urviu. <sup>53</sup> Tasneta marua monar vilon ve sanene, komin naþa sur na yomerava monar imi ve sur nae peni a sur na marena monar yoko imi ve sur naþa mal nalue. <sup>54</sup> Ana pogos naþa toþar tasneta viu na sanene, yoko kila visena na Siriena Marua tai imi ve lelaga nenaga, naþa sape

*“Namāraeraena na malena kiena ne Ntewa mēnelua nena na māraeraena na marena.”*

*Ais 25:8*

<sup>55</sup> E pogos nene, yoko tevisa lele kare sur naþa marena þisa, tevisa sanini tevisave

*“Marena, ko sinoñan osape otauluia, ana nagane kioña kap mare. Kioña nenos naña nayur imimiena sike pe nagane?” Ose 13:14*

<sup>56</sup> Yoko tevis sanene komin navisaluaena naña sike pa rui, naga mla m̄areraena pan p̄elaga na mlamulena viowa loyuña e kieta malena, naña kila ita tepim sane yar lala na kilaroen navisaluaena, a kieta p̄elaga na mlamulena viowa nene mla na m̄areraena pan marena vena ve sa nenos naña kilia yurm̄ar ita. <sup>57</sup> Ana potena pa Ntewa pañisi, komin naña naga kila naña kieta Suṗe Yesu Kristo taulu m̄areraena navisaluaena a m̄areraena na mlamulena viowa a m̄areraena na marena, kila tetol malena naña ve uro re.

<sup>58</sup> Erau nowo lala, komin naña Ntewa kila po pan ita sanene, asum̄alu m̄arera, ve akulkulu kar re, a ayuñāen ruru yuñāena kiena kieta Suṗe amio kiamiu nañareraena wetelu. A pogos naña akila ke sanene, popon asum̄a asitoñal sane kiamiu yuñāena nena ve ve sur korena re, ana yoko monar war mrasa sa naña Suṗe sinenania.

## 16

*Kilavaru naña akoania va li na lelagaena lala nae Yerusalem*

<sup>1</sup> Sineun nesape nela visena laṗasa van amiu e lepas na warpoloen kilavaru vena iilaen li na lelagaena lala nae Yerusalem, naña apane ke pogos m̄arera, limala korena ga e poglis nene. Nemla visena pan sum̄are kar make ga e lepas nae Kalesia rui, a nagane sineun

nesape nevisawal van amiu narui. <sup>2</sup> Sineun nesape nevisa sanini, nesape ve asusu koren re asumã sanene va tol pogos naþa neiñasu nomãalivin amiu ana awarpolo ga nalaena na wa, ana sineun nesape siar nagane, e legiena þesa na legiena olua make ga, kam veve taaga monar ala narin kinakinas nen ya naþa amlavia, ana monar aligan ruru toña ga. <sup>3</sup> Ana pogos naþa neiñasu, yoko towarpolo narin kilavaru la nene imi lele taaga, a yoko akilia akilalua yar laþasa awar nalaena nene va gar Yerusalem. A yoko nesiri maki laþasa awararia va va li na lelagaena lala gar ne, vena visawal amiuena van la. <sup>4</sup> Nemninue ke ga wa pona inu mña nemio la yo, ana yoko nevisulia wa.

### *Mrapa kiena Pol*

<sup>5</sup> Pogaga, kiau mrapa sanini, sineun nesape neva nokom e lepas nae Masitonia sumo, ana suraunia yoko neiñasu nomãalivin amiu. <sup>6</sup> Nemninue ke ga wa nesape yoko nesike nemio amiu va tol pogwai, ana nesitom ke nesape nesike nemio amiu e pogos na miava na pimi ke ne, ana siraun naga nene, akilia aligan inu si e kiau mrapa, vena neva si e nape naþa yoko neva ea. <sup>7</sup> Pe sineun re nokom pun amiu nagane poli naþa nesumã nepanon ke Masitonia, komin visae ve sanene, yoko nekilia nesu yam ve plas ga ne, ana yoko neva ke ne gare sumo wa, siraunia neiñasu, komin naþa visae Suþe tañania, nekekaran naþa yoko nesu towe laa

nemio amiu ve piavi. <sup>8</sup> Nagane nesike Episas, a yoko nesu towe laa e nini na wa, tol pogos na Paḡagena na Yui Marua warovia. <sup>9</sup> Kiau pulmas na kilaen yuḡaena wo la e nini moki ke wa, a suri si tai, nasinekar ḡarera ḡena la mokliu asike e nini, ana pe nekilia re poli naḡa nekilia neyal pogwai.

<sup>10</sup> Visae avisu Timote imi ḡalivin amiu, awis, awo vania, akila naga logewon naḡa sike amio amiu, komin naḡa naga kila ke yuḡaena kiena Suḡe, maran taaga sa ke inu. <sup>11</sup> Ve ataḡan re kam laḡasa avisusu viowa e naga, ana avisuar ruruia e ḡelaga na suḡare, siraun aligan naga e kiena mrapa vena naga kilia wasuḡe ruru imi pun inu, komin nesuḡate ke nesape vena naga amio wolai taḡena lala aim aworu e nini.

<sup>12</sup> E lepas kiena ne kieta puruvi naḡa Apolos, nepiun manene pania vena naga taveve puruvi taḡena la nene aiḡasu pun amiu, ana kiena sitomena ḡarera sape naga nene pe kana pog memes re poli naḡa ḡalivin amiu, ana visae kana pog nena, pona yoko naga sirau iḡasu.

<sup>13</sup> Erau lala, lavis ke kiau visena ḡisi narui, ana sineun nesape nevisa van amiu sane amiu avisuar ruru amiu, asuḡal ruru ase kieta lelagaena, ve sinemiu kurkurun re suria, ana aḡarera. <sup>14</sup> A suri make ga e naḡa akila, monar akila e ḡelaga na sinesiena.

<sup>15</sup> Popon avisu kilale Steḡanas nene amio kiena namratava lala, amio yuḡaena naḡa asuḡa akila ke ne. E yeririna nae make ga e kiamiu



lepas nene, Akaea, la ke nene narui la amlelaga p̄esa. A siraun naṗa amlelaga, asum̄a akila ke yum̄aena wo paṗisi, asum̄a amiila ke li na lelagaena lala pimi tol nagane. <sup>16</sup> Yar nowo la ne sanene, popon avisir plan la vena asumon amiu, a popon avatanon m̄ena yeririna taṗena la naṗa amiyum̄ae ke lele taaga amio la. <sup>17</sup> Steṗanas nene pimi m̄alivi e nini rui, naga pimi amio Posanatas a Akaekas, a nekekaran la telu paṗisi. La asum̄a amiila inu ke e suri moki, torokin ke ga naṗa amiu m̄ena akilia akila visae asike e nini. <sup>18</sup> La telu nene akila po pan amiu rui, ana pogos naṗa apam e nini akila inu m̄ena nemloge po paṗisi, apisirlua kiau sitomena. Popon avisa potena ve keviu van la komin kiela pupia yum̄aena wo na sanene.

<sup>19</sup> Sum̄are make ga lala na lepas nini nae Esia asape asum̄a asitom amiu paṗisi. A kieta erau lua nene, Akwila amio wona na sira Prisila, amio yeririna lala na sum̄are naṗa e m̄ala um̄a, la apisa pokolulagi a pokolemalo pan amiu e kia kiena Suṗe. <sup>20</sup> Kieta erau lala nae yo nini akekaran navitawe amiuena e m̄aki nene, a amiu m̄ena, pogos make ga naṗa avitawe amiu, popon asum̄a atalopan amiu a asum̄a aviran pipimiu, vena akekaran amiu amio sinewo.

<sup>21</sup> Ana siar e narin yo nini, inu Pol nemlarar ke pensel nesum̄a nesiria vena nevisa kiau visena maro van amiu. <sup>22</sup> Monar sinemiu sii ke m̄ena Suṗe ve lelaga, visae peraga, yar naṗa ve sinena sii re naga, visaarena na marena sike e naga. Nesum̄a nemlen ke sanini, nesape Suṗe Yesu,

awis, otom vilaga, <sup>23</sup> a nesuñã nemlotuwo amiu  
ke m̃ena ga, nesape lemamiãna kiena kieta  
Supe Yesu sike amio amiu. <sup>24</sup> A sane silaga,  
nekilia nevisa e kã kiena Kristo Yesu šane kiau  
sinesiena van amiu keviu sulue ga suñã ga.

Kiau m̃aki p̃isi ga e nene narui,

Inu, Pol.

**Lologena Wo Kienane Yesu Kristo Kome  
Kewo  
The New Testament in the Lewo Language of Epi  
Island, Vanuatu  
Le Nouveau Testament en Lewo langue de l'île d'Épi  
au Vanuatu — Niutestamen long Lewo lanwis, blong  
Epi Aelan, Vanuatu**

copyright © 2016 Wycliffe Bible Translators, Inc.

Language: Lewo

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

---

PDF generated using Haiola and XeLaTeX on 11 Nov 2022 from source files dated 22 Nov 2019

ee028e1c-7e53-571d-8041-681daaf580e8